

ԱՂՈԹԱԳՐՔԵՐ

Գ





ՀՐԱՄԱՆԱԲ

Ն.Ս.Օ.Տ.Տ. ԳԱՐԵԳՆԻ ԵՐԿՐՈՐԴԻ

ՍՐԲԱԶՆԱԳՈՅՆ ԵՒ ՎԵՆԱՓԱՌ-
ԿԱԹՈՂԻԿՈՍԻ ԱՄԵՆԱՅՆ ՀԱՅՈՅ

ԱՂՈԹԱԳՐՔԵՐ

Գ

ԳԻՐՔ ԱՂՕԹԻՅ
ՈՐ ԿՈՉԻ

ԿԻՊՐԻԱՆՈՍ

**ՎԱՍՆ ԱՄԵՆԱՅՆ ԱԶԳ ՊԱՏԱՀԱՐԱՅ
ՈՐՔ ԳԱՆ Ի ՎԵՐԱՅ ՄԱՐԴՈՅ**

ՄԱՅՐ ԱԹՈՒ ՍՈՒՐԲ ԷԶՄԻԱՇՆԻ ՀՐԱՏԱՐԱԿՉՈՒԹՅՈՒՆ
Ս. ԷԶՄԻԱՇՆԻՆ - 2010

ՀՏԴ 23/28
ԳՄԴ 86.37
Կ - 508

*Տպագրվում է ևրաշխավորությամբ
Մայր Աթոռ Սուրբ Էջմիածնի
Հրատարակչական Խորհրդի*

ԳԻՐՔ ԱՂՕԹԻՅ ՈՐ ԿՈՉԻ

Կ - 508 ԿԻՊՐԻԱՆՈՍ վասն ամենայն ազգ պայրահարաց որք գան ի վերայ մարդոյ: – Էջմիածին: Մայր Աթոռ Սուրբ Էջմիածին, 2010.– 112 էջ:

Սույն Աղոթագիրքը 1953 թ. Երուսաղեմում տպագրված «Կիպրիանոս» աղոթագրքի վերահրատարակությունն է:

ՀՏԴ 23/28
ԳՄԴ 86.37

ՏՊԱԳՐՎՈՒՄ Է ՄԵԿԵՆԱՍՈՒԹՅԱՄ

«ՍԱՐԳԻՍ ԳԱՔՐԻԵԼՅԱՆ» ՀԻՄՆԱԳՐԱՄԻ

ISBN 978-9939-59-070-7 © Մայր Աթոռ Սուրբ Էջմիածին, 2010 թ.

ԵՐԿՈՒ ԽՈՍՔ

Հայերեն առաջին տպագիր գիրքը՝ Ուրբաթագիրքը, աղոթքների ժողովածու լինելով, բազմիցս վերահրատարակվել է տարբեր անուններով՝ «Գիրք աղօթից» (Կ. Պոլիս, 1799), «Ակն հոգեկան» (Ս. Էջմիածին, 1683), «Աղօթագիրք» (Կ. Պոլիս, 1798) և այլն: Այս բոլոր աղոթագրքերի բովանդակությունը, չնչին տարբերությամբ, գրեթե նույնն է: Որոշ հայագետներ այդ աղոթագրքերին տվել են նաև «Կիպրիանոս» անունը, և վերջին ժամանակներում դրանք վերահրատարակվել են «Գիրք աղօթից որ կոչի ԿԻՊՐԻԱՆՈՍ վասն ամենայն ազգ պատահարաց, որք գան ի վերայ մարդոյ» կամ «Աղօթագիրք ԿԻՊՐԻԱՆՈՍ, որ կոչի նաև ՀԱԶԱՐ ԵՒ ՄԷԿ ԱՆՈՒՆ» վերնագրերով:

Այս աղոթագրքերի մէջ ընդգրկված են ս. Ներսես Շնորհալու «Հաւատով խոստովանին» աղոթքը, Հովհաննես Գառնեցու մի քանի աղոթքներ («Առ Սուրբ Աստուածածին», «Վասն ճանապարհի»), ավետարաններից բժշկության մի քանի դրվագ, Անտիոքի եպիսկոպոս ս. Կիպրիանոսի* դարձի պատմություն-

* Սրբերի վկայաբանությունը հիշում է երկու Կիպրիանոս, երկուսն էլ ապրել են Գ. դարում. Կիպրիանոս Կարթագենացի վարդապետը՝ նահատակվել է 255 թ., և Կիպրիանոս Անտիոքացին՝ մոզոնությունից քրիստոնեության է դարձել

նը, նույն Կիպրիանոսին վերագրված մի քանի պահպանիչ աղոթք (Ուրբաթագրքում՝ «Աղօթք սրբոյն Կիպրիանոսի, զոր ասացեալ է վասն դիւաց եւ վասն կախարդաց, եւ աղանդաց», «ընդդէմ բնաւին այսոց պղծոց եւ ընդդէմ համայնից պատահարաց չարաց, եւ մանաւանդ ընդդէմ հնարագործութեան դիւականաց»), Ս. Գրիգոր Նարեկացու մատյանի որոշ հատվածներ (Բան ժԲ., ԻԸ., ԽԱ., ՉԴ., ՉԹ., Դ., ԴԴ., ԴԵ.), գոհաբանական որոշ աղոթքներ («Աղերս առ Ս. Առաքեալսն», «Գովեստ Ս. Խաչին», «Անուանք սուրբ նշանացն» և այլն): Այս է պատճառը, որ Աղոթագիրքը կոչել են «Կիպրիանոս» անունով (կարևորելով ս. Կիպրիանոսի դարձի պատմությունը և նրա աղոթքները):

«Կիպրիանոսի» ներկա հրատարակությունը 1953 թ. Երուսաղեմում տպագրված աղոթագրքի վերահրատարակությունն է:

Նախատեսված է ընթերցողների լայն շրջանակի համար:

Հրատարակչական բաժին



և նահատակվել 285 թ., Դիոկղետիանոս կայսեր օրոք: Ս. Կիպրիանոս Անտիոքացի եպիսկոպոսի վկայաբանությունը կա Հայոց Հայսմավուրքներում. տե՛ս Համաբարբառ Յայսմաւուրք, Ժ., հոկտեմբեր 2, Ս. Էջմիածին, 2010՝ «Կիպրիանոս եպիսկոպոսի և Յուստիանե կոյսի վկայաբանութիւնը»:



ԱՂՕԹՔ ՊԻՏԱՆԻՔ

**ԻԲՐԱՔԱՆՉԻԻՐ ԱՆՁԻՆ
ՏԱԲԱՏԱՅԵԼՈՅ Ի ՔՐԻՍՏՈՍ
ԱՐԱՐԵԱԼ**

**Սրբոյն Ներսեսի Շնորհալոյ
Հայոց Կաթուիկոսի**

*Հաւատով խոստովանիմ և երկիրպա-
գանեմ քեզ, Հայր և Որդի և Սուրբ Հոգի,
անեղ և անմահ բնութիւն, արարիչ հրեշ-
տակաց և մարդկան և ամենայն եղելոց,
ողորմեա՛ քո արարածոց և ինձ՝ բազմա-
մեղիս:*

Հաւատով խոստովանիմ և երկիրպագանեմ քեզ, անբաժանելի լոյս, միասնական Սուրբ Երրորդութիւն և մի Աստուածութիւն, արարիչ լուսոյ և հալածիչ խաւարի, հալածեա՛ ի հոգւոյ իմմէ զխաւար մեղաց և անգիտութեան, և լուսաւորեա՛ զմիտս իմ ի ժամուս յայսմիկ աղօթել քեզ ի հաճոյս և ընդունել ի քէն զխնդրուածս իմ. և ողորմեա՛ քո արարածոց և ինձ՝ բազմամեղիս:

Հայր երկնաւոր Աստուած ճշմարիտ, որ առաքեցեր զՈրդիդ քո սիրելի ի խնդիր մոլորեալ ոչխարին, մեղայ յերկինս և առաջի քո, ընկա՛լ զիս որպէս զանառակ որդին և զգեցո՛ ինձ զպատմուճանն զառաջին, զոր մերկացայ մեղօք. և ողորմեա՛ քո արարածոց և ինձ՝ բազմամեղիս:

Որդի Աստուծոյ Աստուած ճշմարիտ, որ խոնարհեցար ի հայրական ծոցոյ և

առեր մարմին ի սրբոյ կուսէն Մարիամայ, վասն մերոյ փրկութեան խաչեցար, թաղեցար և յարեար ի մեռելոց և համբարձար փառօք առ Հայր, մեղայ յերկինս և առաջի քո, յիշեա՛ զիս որպէս զաւազակն, յորժամ զաս արքայութեամբդ քով. և ողորմեա՛ քո արարածոց և ինձ՝ բազմամեղիս:

Հոգի Աստուծոյ Աստուած ճշմարիտ, որ իջեր ի Յորդանան և ի Վերնատունն և լուսաւորեցեր զիս մկրտութեամբ սուրբ աւազանին, մեղայ յերկինս և առաջի քո, մաքրեա՛ զիս աստուածային հրով քով՝ որպէս հրեղէն լեզուօք սուրբ զառաքեալսն. և ողորմեա՛ քո արարածոց և ինձ՝ բազմամեղիս:

Անեղ բնութիւն, մեղայ քեզ մտօք իմովք, հոգւով և մարմնով իմով, մի՛ յիշեր զմեղս իմ զառաջինս վասն անուանդ քում սրբոյ. և ողորմեա՛ քո արարածոց և ինձ՝ բազմամեղիս:

Տեսող ամենայնի, մեղայ քեզ խորհրդով, բանիւ և գործով, ջնջեա՛ գձեռագիր յանցանաց իմոց և գրեա՛ գանուն իմ ի դպրութեան կենաց. և ողորմեա՛ քո արարածոց և ինձ՝ բազմամեղիս:

Քննող գաղտնեաց, մեղայ քեզ կամայ և ակամայ, գիտութեամբ և անգիտութեամբ, թողութիւն շնորհեա՛ մեղաւորիս, զի ի ծննդենէ սուրբ աւագանին մինչև ցայսօր մեղուցեալ եմ առաջի Աստուածութեանդ քոյ զգայարանօք իմովք և ամենայն անդամօք մարմնոյս. և ողորմեա՛ քո արարածոց և ինձ՝ բազմամեղիս:

Ամենախնամ Տէր, դի՛ր պահապան աչաց իմոց գերկիւղ քո սուրբ՝ ոչ ևս հայիլ յայրատ, և ականջաց իմոց՝ ոչ ախորժել լսել զբանս չարութեան, և բերանոյ իմոյ՝ ոչ խօսել զստութիւն, և սրտի իմոյ՝ ոչ խորհել զչարութիւն, և ձեռաց իմոց՝

ոչ գործել զանիրաւութիւն, և ոտից իմոց՝ ոչ գնալ ի ճանապարհս անօրէնութեան, այլ ուղղեա՛ զչարժումն սոցա լինել միշտ ըստ պատուիրանաց քոց յամենայնի. և ողորմեա՛ քո արարածոց և ինձ՝ բազմամեղիս:

Հուր կենդանի Քրիստոս, զհուր սիրոյ քոյ, զոր արկեր յերկիր, բորբոքեա՛ յանձն իմ, զի այրեսցէ գաղտ հոգւոյ իմոյ, և սրբեսցէ զխիղճ մտաց իմոց, և մաքրեսցէ զմեղս մարմնոյ իմոյ, և վառեսցէ զլոյս գիտութեան քոյ ի սրտի իմում. և ողորմեա՛ քո արարածոց և ինձ՝ բազմամեղիս:

Իմաստութիւն Հօր Յիսուս, տո՛ւր ինձ իմաստութիւն զբարիս խորհել և խօսել և գործել առաջի քո յամենայն ժամ. ի չար խորհրդոց, ի բանից և ի գործոց փրկեա՛ զիս. և ողորմեա՛ քո արարածոց և ինձ՝ բազմամեղիս:

Կամեցող բարեաց Տէր կամարար, մի՛ թողուր զիս ի կամս անձին իմոյ գնալ, այլ առաջնորդեա՛ ինձ լինել միշտ ըստ կամաց քոց բարեսիրաց. և ողորմեա՛ քո արարածոց և ինձ՝ բազմամեղիս:

Արքա՛յ երկնաւոր, տուր ինձ զարքայուլթիւն քո, զոր խոստացար սիրելեաց քոց, և զօրացո՛ զսիրտ իմ ատել զմեղս, և սիրել զքեզ միայն, և առնել զակմս քո. և ողորմեա՛ քո արարածոց և ինձ՝ բազմամեղիս:

Խնամող արարածոց, պահեա՛ նշանաւ խաչի քո զհոգի և զմարմին իմ ի պատրանաց մեղաց, ի փորձութեանց դիւաց և ի մարդոց անիրաւաց, և յամենայն վտանգից հոգւոյ և մարմնոյ. և ողորմեա՛ քո արարածոց և ինձ՝ բազմամեղիս:

Պահապան ամենայնի Քրիստոս, աջ քո հովանի լիցի ի վերայ իմ ի տուէ և ի գիշերի, ի նստել ի տան, ի գնալ ի ճանապարհ, ի ննջել և ի յառնել, զի մի՛ երբէք սասանեցայց. և ողորմեա՛ քո արարածոց և ինձ՝ բազմամեղիս:

Աստուած իմ, որ բանաս զձեռս քո և ընուս զամենայն արարածս ողորմութեամբ քով, քեզ յանձն առնեմ զանձն իմ. դու հոգա՛ և պատրաստեա՛ զպէտս հոգւոյ և մարմնոյ իմոյ յայսմհետէ մինչև յաւիտեան. և ողորմեա՛ քո արարածոց և ինձ՝ բազմամեղիս:

Դարձուցիչ մոլորելոց, դարձո՛ զիս ի չար սովորութեանց իմոց ի բարի սովորութիւն և բեւեռեա՛ ի հոգի իմ զսոսկալի օր մահուն, և գերկիւղ գեհենոյն, և զսէր արքայութեանն, զի զղջացայց ի մեղաց և գործեցից զարդարութիւն. և ողորմեա՛ քո արարածոց և ինձ՝ բազմամեղիս:

Աղբբիւր անմահութեան, աղբբրացո՛ր ի սրտէ իմմէ զարտասուս ապաշխարութեան որպէս պոռնկին, զի լուացից զմեղս անձին իմոյ յառաջ քան զելանելն իմ յաշխարհէս. և ողորմեա՛ քո արարածոց և ինձ՝ բազմամեղիս:

Պարգևիչ ողորմութեան, պարգևեա՛ ինձ ուղղափառ հաւատով և բարի գործով, և սուրբ մարմնոյ և արեան քոյ հաղորդութեամբ գալ առ քեզ. և ողորմեա՛ քո արարածոց և ինձ՝ բազմամեղիս:

Բարերար Տէր, հրեշտակի բարւոյ յանձն արասցես զիս քաղցրութեամբաւանդել զհոգի իմ և անխռով անցունել ընդ չարութիւն այսոցն, որք են ի ներքոյ երկնից. և ողորմեա՛ քո արարածոց և ինձ՝ բազմամեղիս:

Լոյս ճշմարիտ Քրիստոս, արժանաւորեա՛ զհոգի իմ ուրախութեամբ ուրախութեամբ տեսանել զլոյս փառաց քոց ի

կոչման աւուրն, և հանգչել յուսով բարեաց յօթևանս արդարոց՝ մինչև յօր մեծի գալստեան քոյ. և ողորմեա՛ քո արարածոց և ինձ՝ բազմամեղիս:

Դատաւոր արդար, յորժամ գաս փառօք Հօր դատել զկենդանիս և զմեռեալս, մի՛ մատներ ի դատաստան ընդ ծառայի քում, այլ փրկեա՛ զիս ի յաւիտենական հրոյն և լսելի արա՛ ինձ զերանաւէտ կոչումն արդարոց յերկնից արքայութիւնդ. և ողորմեա՛ քո արարածոց և ինձ՝ բազմամեղիս:

Ամենողորմ Տէր, ողորմեա՛ ամենայն հաւատացելոց ի քեզ, իմոց և օտարաց, ծանօթից և անծանօթից, կենդանեաց և մեռելոց. շնորհեա՛ և թշնամեաց իմոց և ատելեաց զթողութիւն, որ առ իս յանցանացն, և դարձո՛ զնոսս ի հարեացն, զոր ունին վասն իմ, զի ողորմութեանդ քում արժանի եղիցին. և ողորմեա՛ քո արարածոց և ինձ՝ բազմամեղիս:

Փառաւորեալ Տէր, ընկա՛լ զաղա-
ջանս ծառայիս քոյ և կատարեա՛ր ի բա-
րի զխնդրուածս իմ բարեխօսութեամբ
սրբուհւոյ Աստուածածնին և Յովհան-
նու Մկրտչին, և Ստեփանոսի Նախավ-
կային, և սրբոյն Գրիգորի մերոյ Լու-
սաւորչին, և սրբոց առաքելոց, մար-
գարէից, վարդապետաց, մարտիրոսաց,
հայրապետաց, ճգնաւորաց, կուսանաց,
միանձանց և ամենայն սրբոց քոց երկ-
նաւորաց և երկրաւորաց: Եւ քեզ փառք
և երկրպագութիւն անբաժանելի Սուրբ
Երրորդութեանդ յաւիտեանս յաւիտե-
նից ամէն:



ԱՂՕԹՔ ՊԱՏՊԱՆՈՒԹԵԱՆ

Անսկիզբն Աստուած, անեղ Աստուած, անհիմանալի Աստուած, անպարագրելի Աստուած, անծին Աստուած, ամէնարքայ Աստուած, ամէնարարիչ Աստուած, ամէնարփի Աստուած, ամենագէտ Աստուած, ամէնարագ Աստուած, ամենադատ Աստուած, ամենամեծ Աստուած, ամէնազբիւր Աստուած, ամէնարմատ Աստուած, ամէնարձակ Աստուած, ամենայց Աստուած, ամենայցելու Աստուած, ամէնազղու Աստուած, ամէնազղիչ Աստուած, ամէնասաց Աստուած, ամէնարթուն Աստուած, ամենաբաւ Աստուած, ամենաբարձրեալ Աստուած, ամենաբերկրեալ Աստուած, ամենաբաւական Աստուած, ամենաբարի Աստուած, ամենաբոյժ Աստուած, ամենաբուժիչ Աստուած, ամենաբուղիս Աստուած, ամենաբաշխ Աստուած, ամենա-

զով Աստուած, ամենագովելի Աստուած, ամենագովեալ Աստուած, ամենագուլթ Աստուած, ամենագլթած Աստուած, ամենագտիչ Աստուած, ամենագանձ Աստուած, ամենագորով Աստուած, ամենայար Աստուած, ամենադատաւոր Աստուած, ամենադաւանեալ Աստուած, ամենադիր Աստուած, ամենադարման Աստուած, ամենադարմանիչ Աստուած, ամենանեղերիչ Աստուած, ամենաներբ Աստուած, ամենազօր Աստուած, ամենազօրեղ Աստուած, ամենազարդ Աստուած, ամենազարդարող Աստուած, ամենազարդարիչ Աստուած, ամենազեղ Աստուած, ամենափրկիչ Աստուած, ամենաէն Աստուած, ամենաէակ Աստուած, ամենաներկինք Աստուած, ամենասուրբ Աստուած, ամէնողորմ Աստուած, ամենամեծ Աստուած, ամենամաքուր Աստուած, ամենաընտրող Աստուած, ամենաընդունակ Աստուած, ամենաընդունող Աստուած, ամենաըզձումն Աստուած, ամենաթագ Աստուած, ամենաթագաւոր Աստուած, ամենաժառանգ Աս-

տողած, ամենիշխան Աստուած, ամէնիշխող
Աստուած, ամէնիմաստ Աստուած, ամենաի-
րաւ Աստուած, ամենալոյս Աստուած, ամե-
նալիր Աստուած, ամենալրումն Աստուած,
ամենախնամ Աստուած, ամենախնամող
Աստուած, ամենախօս Աստուած, ամենա-
խրատ Աստուած, ամենախորին Աստուած,
ամենախորհուրդ Աստուած, ամենածա-
գումն Աստուած, ամենածաւալ Աստուած,
ամենակալ Աստուած, ամենակիր Աստուած,
ամենակրող Աստուած, ամենակայծ Աս-
տուած, ամենակատար Աստուած, ամենակոչ
Աստուած, ամենակէտ Աստուած, ամենահաս
Աստուած, ամենահասու Աստուած, ամե-
նահաստատ Աստուած, ամենահաստատիչ
Աստուած, ամենաձիր Աստուած, ամենա-
ձեռն Աստուած, ամենաձեռնտու Աստուած,
ամենաղեկավար Աստուած, ամենաղամբար
Աստուած, ամենաճարակ Աստուած, ամե-
նաճառագայթ Աստուած, ամենաճշմարիտ
Աստուած, ամենամաքրիչ Աստուած, ամե-
նամարդ Աստուած, ամենամարգիչ Աս-

տուած, ամենայարոյց Աստուած, ամենայա-
ռաջ Աստուած, ամենուրեք Աստուած,
ամենայորդոր Աստուած, ամենայորդորիչ
Աստուած, ամենայոյս Աստուած, ամենա-
շարժ Աստուած, ամենաշունչ Աստուած,
ամենաշահ Աստուած, ամենաշահաւոր Աս-
տուած, ամենաշէն Աստուած, ամենաուղ-
ղորդ Աստուած, ամենաուղիղ Աստուած,
ամենաուժեղ Աստուած, ամէնոռոգ Աս-
տուած, ամենաչափող Աստուած, ամենա-
պատիւ Աստուած, ամենապարգև Աստուած,
ամենասաստիչ Աստուած, ամենապարզ
Աստուած, ամենապարզիչ Աստուած, ամե-
նապահ Աստուած, ամենապահող Աստուած,
ամենապարագրող Աստուած, ամենապայ-
ծառ Աստուած, ամենապարոյր Աստուած,
ամենաջահ Աստուած, ամենաջան Աստուած,
ամենաջամբ Աստուած, ամէնառատ Աս-
տուած, ամէնառատացուցիչ Աստուած,
ամենասրբիչ Աստուած, ամենասահման
Աստուած, ամենասահմանիչ Աստուած,
ամենասանձ Աստուած, ամենասանձող

Աստուած, ամենասփիւռ Աստուած, ամենասուր Աստուած, ամենավարժիչ Աստուած, ամենավարիչ Աստուած, ամենամաքրիչ Աստուած, ամենավայելուչ Աստուած, ամենատէր Աստուած, ամենատիրող Աստուած, ամենատեղ Աստուած, ամենատու Աստուած, ամենատօն Աստուած, ամենատես Աստուած, ամենատեսուչ Աստուած, ամենապատիւ Աստուած, ամենաբուն Աստուած, ամէնարարիչ Աստուած, ամենացօղ Աստուած, ամենացայտ Աստուած, ամենացայտող Աստուած, ամենացայգ Աստուած, ամենացնծովիւն Աստուած, ամենացանկ Աստուած, ամենացանկալի Աստուած, ամենափառք Աստուած, ամենափայլ Աստուած, ամենափայլող Աստուած, ամենափայլեալ Աստուած, ամենափայլիչ Աստուած, ամենափոյթ Աստուած, ամենափրկող Աստուած, ամենափրկիչ Աստուած, ամենաքաւ Աստուած, ամենաքաւիչ Աստուած, ամենաքարող Աստուած, ամենաքարողիչ

Աստուած, անճառ Աստուած, անճառաբայ Աստուած, անճառ արքայութիւն Աստուած, անճառազատութիւն Աստուած, անճառաղբիւր Աստուած, անճառարարիչ Աստուած, անճառապենիազ* Աստուած, անճառարփի Աստուած, անճառահաւոր Աստուած, անճառախոր Աստուած, անճառաբարի Աստուած, անճառաբաց Աստուած, անճառաբողիւս Աստուած, անճառագուլթ Աստուած, անճառագօր Աստուած, անճառիմաստ Աստուած, անճառալուր Աստուած, անճառածագ Աստուած, անճառագով Աստուած, անճառողորմ Աստուած, անճառաչափ Աստուած, անճառաչափ Աստուած, անճառապատիւ Աստուած, անճառավեհ Աստուած, անճառափառ Աստուած, անճառափայլ Աստուած, անախտ Աստուած, անեզր Աստուած, անեղծ Աստուած, անըմբռնելի Աստուած, անժամանակ Աստուած, անլուելի Աստուած, անխարդախ Աստուած, անծայր

* Անճառապենիազ՝ անճառ և ապենիազ (=անկարող, անպակաս, անվազ) բառերից կազմված (ծնթ. հրատ.):

Աստուած, անետղ* Աստուած, անհասանելի Աստուած, անդողելի Աստուած, անմեկնելի Աստուած, անյիշաչար Աստուած, աննինջ Աստուած, անշարժ Աստուած, անոխակալ Աստուած, անպատմելի Աստուած, անկոխելի Աստուած, աննեղելի Աստուած, անօրինակ Աստուած:

Բարի Աստուած, բարեմիտ Աստուած, բարի բնութիւն Աստուած, բարեաց բարի Աստուած, բարեգութ Աստուած, բարեբաշխ Աստուած, բարեբարոյ Աստուած, բարեխորուրդ Աստուած, բարեաց պարգևող Աստուած, բարեսէր Աստուած:

Գովեալ Աստուած, գերիվերոյ Աստուած, գերազարդ Աստուած, գոհաբանեալ Աստուած, գերապանծ Աստուած, գեղեցիկ Աստուած, գերագոյն Աստուած, գոյացուցիչ Աստուած:

* Անետղ՝ ան+ետղ (=տղ), այսինքն՝ անսահմանափակ, անրովանդակելի (ծնթ. հրատ.):

Դատաւոր Աստուած, դատաւորաց դէտ Աստուած, դիտապետ Աստուած, դասաւորիչ Աստուած, դաւանեալ Աստուած, դասուց վերնոց Աստուած, դեղ կենաց Աստուած, դաստիարակող Աստուած, զրախտ Աստուած:

Երրորդութիւն Աստուած, երկինք Աստուած, երկնաւորաց Աստուած, երկրաւորաց Աստուած:

Չօրաւոր Աստուած, զօրութիւն Աստուած, զօրեղ Աստուած, զուարթնոց Աստուած, զարդարող Աստուած, զարմանք Աստուած, զարմանալի Աստուած, զարհուրելի Աստուած, զարդագին Աստուած:

Էրբեակ և մի Աստուած, էրանեալ Աստուած, էական Աստուած, էացուցիչ Աստուած, էութիւն Աստուած:

Թագաւորաց Աստուած, թագեալ
Աստուած, թողիչ մեղաց Աստուած, թո-
ղելոց յարութիւն Աստուած, թշնամեաց
սատակիչ Աստուած:

Ժառանգութիւն Աստուած, ժամա-
նակեալ Աստուած, ժամանող Աստուած,
ժամանակաց Աստուած:

Ի սկզբանէ Աստուած, ինքնակամ
Աստուած, ինքնագոյ Աստուած, ինքնա-
կալ Աստուած, ինքնատար Աստուած,
ինքնակարող Աստուած, ինքնիշխան
Աստուած, իշխող Աստուած, ի բարձունս
Աստուած, իմանալի Աստուած:

Լոյս Աստուած, լոյս անստուէր
Աստուած, լոյս թափանցիկ Աստուած,
լուսազգեստ Աստուած, լուսաւորիչ
Աստուած, լուսազարդ Աստուած, լու-
սատու Աստուած, լուսաճեմ Աստուած,

լսող Աստուած, լիութիւն Աստուած,
լցուցիչ Աստուած:

Խոր անքնին Աստուած, խաղա-
ղութիւն Աստուած, խնամող Աստուած,
խնամիչ Աստուած, խրատիչ Աստուած,
խանդաղատող Աստուած, խորհուրդ
Աստուած, խորհրդապետ Աստուած,
խնդրուած Աստուած, խորհրդագէտ
Աստուած, խնդրող Աստուած, խոնարհ
Աստուած:

Շագունն Աստուած, ծնող Աստուած,
ծագող Աստուած, ծարաւելոց Աստուած,
ծանուցեալ Աստուած, ծանուցիչ Աս-
տուած, ծառայից տէր Աստուած, ծած-
կատես Աստուած, ծակագէտ Աստուած,
ծայր Աստուած:

Կենդանի Աստուած, կենդանարար
Աստուած, կենդանատու Աստուած,

կենդանացուցիչ Աստուած, կերակրող
Աստուած, կամարար Աստուած, կեանք
Աստուած, կամեցող բարեաց Աստուած,
կատարեալ Աստուած, կառավարող
Աստուած, կուրաց լուսատու Աստուած:

Հայր Աստուած, Հօր Որդի Աստուած,
Հոգի Սուրբ Աստուած, հաւատ Աստուած,
համերց լեզուատու Աստուած, հոգ-
ւոց ազատիչ Աստուած, հրածորան
Աստուած, հրակիրող Աստուած, հինա-
ւուրց Աստուած, հարուստ Աստուած,
հանուրց Աստուած, հաւատարիմ
Աստուած:

Չայն Աստուած, ձայնող Աստուած,
ձեռնտու Աստուած, ձայնից լսող Աս-
տուած, ձիր Աստուած, ձիրաբաշխ Աս-
տուած:

Ղեկավար Աստուած, ղեկապետ Աս-
տուած, ղամպար Աստուած:

Ճշմարիտ Աստուած, ճշմարտութիւն
Աստուած, ճշմարտասէր Աստուած,
ճարտարապետ Աստուած, ճառագայթ
Աստուած, ճառագայթեալ Աստուած,
ճոխ Աստուած, ճաշակն Աստուած, ճար
Աստուած, ճանապարհ կենաց Աստուած,
ճանապարհ բարեաց Աստուած, ճառ
Աստուած, ճոռոմ Աստուած:

Մեծարեալ Աստուած, մեծապատիւ
Աստուած, մաքրիչ Աստուած, մաքրու-
թիւն Աստուած, մաքրող Աստուած, մա-
հու լուսատու Աստուած, մեղաւորաց
ղարձ Աստուած:

Յայտնութիւն Աստուած, յաւիտեան
Աստուած, յաւիտենից Աստուած, յարու-
թիւն Աստուած, յուսացելոց Աստուած,
յուսադրող Աստուած, յարուցիչ
Աստուած, յառաջ Աստուած:

Նեղելոց յոյս Աստուած, նորահրաշ
Աստուած, նաւապետ բարի Աստուած:

Հնորհ Աստուած, շնորհատու Աստուած, շուրջ Աստուած, շուրջանակի Աստուած, շնորհող Աստուած, շնորհաբեր Աստուած, շաւիղ Աստուած:

Ողորմած Աստուած, ողորմութիւն Աստուած, ուղիղ Աստուած, ուղղորդ Աստուած, ուղղորդասէր Աստուած, ուղղորդապետ Աստուած, ուղղորդախօս Աստուած, ուղղորդաբան Աստուած:

Չարատեաց Աստուած, չարասաստ Աստուած, չարամերժ Աստուած, չարաբարձ Աստուած, չարահերձ Աստուած, չարայաղթ Աստուած:

Պահապան Աստուած, պահպանիչ Աստուած, պետ Աստուած, պետական Աստուած, պատուելի Աստուած, պարունակող Աստուած:

Չահ Աստուած, ջահալոյս Աստուած, ջահապայծառ Աստուած, ջան Աստուած,

ջամբող Աստուած, ջերմեռանդութիւն Աստուած:

Ռահ Աստուած, ռահ լոյս Աստուած, ռատաբաշխ Աստուած, ռատափայլ Աստուած, ռետին քաղցր Աստուած, ռահավարժ Աստուած:

Սուրբ Աստուած, սրբութիւն Աստուած, սաբաւօթ Աստուած, սէր Աստուած, սիրելի Աստուած, սահմանադիր Աստուած, ստեղծող Աստուած, սրբոց Աստուած, սոսկալի Աստուած:

Վեհ Աստուած, վեհագոյն Աստուած, վայելչութիւն Աստուած, վերակացու Աստուած, վարժիչ Աստուած:

Տէր Աստուած, տեսող Աստուած, տիւ Աստուած, տուիչ բարեաց Աստուած, տրամեցելոց Աստուած:

Բաբուն Աստուած, բաբունապետ
Աստուած, բախարար Աստուած:


Յնծութիւն Աստուած, ցանկալի
Աստուած, ցաւոց բժիշկ Աստուած, ցօ-
ղահոս Աստուած:

Փառք Աստուած, փառաւորեալ
Աստուած, փառահեղ Աստուած,
փառաբանեալ Աստուած, փրկիչ
Աստուած, փրկող Աստուած, փարթամ
Աստուած, փարատիչ ցաւոց Աստուած,
փառազոր Աստուած, փառք ի բարձունս
Աստուած:

Քահանայապետ Աստուած, քերով-
բէանիստ Աստուած, քաւիչ Աստուած,
քաւութիւն Աստուած, քաւարան
Աստուած, քարոզիչ Աստուած, քննող
Աստուած:

Օրհնք Աստուած, օրինադիր Աս-
տուած, օրհնիչ Աստուած, օրհնեալ
Աստուած, օրհնաբանեալ Աստուած:

Քո սուրբ և ահեղ անուանցդ զօրու-
թեամբ, Տէր Աստուած ամենակալ, եղի-
ցիս պահապան ծառայիս:





Ահա գառն Աստուծոյ՝
որ բառնայ զմեղս աշխարհի:

ԱՂՕԹՔ

Վասն կապանաց դիւաց և կախարդաց,
աղանդաւորաց և վասն դատաստանի
յաջողելոյ

Թագաւոր հզօր, ապաւէն ծարաւելոց,
փրկիչ նեղելոց, որ վասն մեր խոնարհեցար
ի հայրական ծոցոյ և առեր մարմին
ի սրբոյ կուսէն Մարիամայ վասն մերոյ
փրկութեան, մատնեցար, ըմբռնեցար,
չարչարեցար, խաչեցար և թաղեցար և
յարեար ի մեռելոց, և համբարձար փա-
ռօք առ Հայր. զարթո՛ւ զգօրութիւն քո
և ե՛կ ի կեցուցանել զգինս արեան քո,
Տէ՛ր, և մի՛ տար գերել սատանայի զքո
փրկեալս, և մի՛ տար բնակութիւն չա-
րին՝ զտաճար անուանդ քոյ սրբոյ. և մի՛
զլքեալս քեզ մարմին և անդամ թողուլ
ի կոխումն և ի կատականս չարին, այլ
գլթա՛ ի քո արարածս արարչական սիրով.

Տէ՛ր, ողորմեա՛ մեզ, զի ի խաչ քո պարծելով պարծեցաք, և պահելով պահեսցէ զմեզ յերևելի և աներևոյթ թշնամւոյն. և լիցի պահապան ծառայիս Աստուծոյ. ամէն:

Չար իշխանքն հալածին,
Որք ընդ ծառայս քո մարտնչին,
Երևելով նշան խաչին,
Աներևոյթք կործանեսցին:



ՍՈՒՐԲ ԱԲԵՏԱՐԱՆՍ ՈՐ ԸՍՏ ՄԱՏԹԷՈՍԻ

Եւ մինչդեռ անցանէր ընդ այն Յիսուս, զհետ եղեն նորա կոյրք երկու, աղաղակէին և ասէին. Ողորմեա՛ց մեզ, Որդի Դաւթի: Եւ իբրև եկն ի տուն, մատեան առ նա կոյրքն, և ասէ ցնոսա Յիսուս. Հաւատա՞յք եթէ կարող եմ առնել ձեզ զայդ. ասեն ցնա՝ «Այո, Տէր»: Յայնժամ մերձեցաւ յաչս նոցա և ասէ. «Ըստ հաւատոց ձերոց եղիցի ձեզ»: Եւ բացան աչք նոցա. և սաստեաց նոցա Յիսուս և ասէ. «Զգոյշ կացէ՛ք, մի՛ ոք գիտասցէ»: Եւ նոքա ելեալ համբաւեցին զնա ընդ ամենայն երկիրն ընդ այն: Եւ յեւանելն նոցա արտաքս, ահա մատուցին առ նա այր մի համր դիւահար: Եւ յեւանելն դիւին՝ խօսեցաւ համրն, և զարմացան

ժողովուրդքն և ասեն թէ և ոչ երբէք
երևեցաւ այսպիսի ինչ յիսրայէլի: Իսկ
փարիսեցիքն ասէին, թէ իշխանաւն դի-
ւաց հանէ դա զդևս:

ՍՈՒՐԲ ԱԲԵՏԱՐԱՆՍ ՈՐ ԸՍՏ ՄԱՐԿՈՍԻ

Եւ ել լուր նորա ընդ ամենայն կողմն
գալիլիացւոց: Եւ վաղվաղակի ելեալ
ի ժողովրդենէն, եկն ի տուն Սիմոնի և
Անդրեայ, Յակոբու և Յովհաննու հան-
դերձ: Եւ զոքանչ Սիմոնի դնէր ջերմա-
ցեալ, վաղվաղակի ասեն ցնա վասն նո-
րա: Եւ մատուցեալ յարոյց զնա, կալեալ
զձեռանէ նորա. և եթող զնա տենդն և
պաշտէր զնոսա: Եւ իբրև երեկոյ եղև
ի մտանել արեգականն, բերէին առ նա
զամենայն հիւանդս և զդիւահարս. և
էր ամենայն քաղաքն ժողովեալ առ
դրունսն: Եւ բժշկեաց բազում հիւանդս

ի պէս պէս ախտից և դևս բազում եհան,
և ոչ տայր խօսիլ դիւացն, զի գիտէին
զնա թէ Քրիստոսն է:

ՍՈՒՐԲ ԱԲԵՏԱՐԱՆՍ ՈՐ ԸՍՏ ՂՈՒԿԱՍՈՒ

Եւ եղև ընդ աւուրսն ընդ այնոսիկ ել
ի լեառն կալ յաղօթս, և հանէր զգիշերն
ի գլուխ յաղօթսն Աստուծոյ: Եւ իբրև
այդ եղև, կոչեաց զաշակերտսն իւր և
ընտրեաց ի նոցանէ երկոտասանս, զորս
և առաքեալս անուանեաց: ԶՍիմոն, զոր
և Պետրոս անուանեաց, և զԱնդրէաս
զեղբայր նորին և զՅակոբոս և զՅովհան-
նէս, և զՓիլիպպոս և զԲարդուղիմէոս:
Եւ Մատթէոս և զԹովմաս, և զՅակոբոս
Ալփեայ. և զՍիմոն զկոչեցեալն Նախան-
ձայոյզ և զՅուդայ Յակովբայ, և զՅու-
դայ Իսկարիովտացի, որ եղև իսկ մատ-
նիչ: Եւ իջեալ նոքօք հանդերձ ի տեղի

մի տափարակ, և ժողով աշակերտացն նորա և բազմութիւն յոյժ ժողովրդեանն, յամենայն Հրէաստանէ և յԵրուսաղեմէ, և յայնմ կողմանէ, և ի ծովեզերէն Տիւրոսի և Սիւդովնի, որք եկին լսել ի նմանէ, և բժշկիլ ի հիւանդութենէ իւրեանց. և նեղեալքն յայտոց պղծոց բժշկէին: Եւ ամենայն ժողովուրդն խնդրէր մերձենալ ի նա, զի զօրութիւն բազում ելանէր ի նմանէ և բժշկէր զամենեսին:

ՍՈՒՐԲ ԱԲԵՏԱՐԱՆՍ ՈՐ ԸՍՏ ՅՈՎՆԱՆՆՈՒ

Յետ այսորիկ տօն էր Հրէից, և ել Յիսուս յԵրուսաղէմ: Եւ էր յԵրուսաղէմ ի Պրոպատիկէ աւազանին, որ կոչէր եբրայեցերէն Բեդճեզդա, հինգ սրահ: Յորս անկեալ դնէր բազմութիւն յոյժ հիւանդաց, կուրաց, կաղաց, գօսացելոց, որք ական ունէին ջրոցն յուզելոյ: Եւ հրեշտակ Տեառն իջանէր ըստ ժամանակի

յաւազանն և յուզէր զջուրսն, և որ նախ ի շարժումն ջուրցն իջանէր յաւազանն՝ բժշկէր, ոչ ունելով նշան հիւանդութեան: Եւ անդ էր այր մի, որոյ երեսուն և ութ ամ էր ի հիւանդութեան իւրում:

Ջնա իբրև ետես Յիսուս զի անկեալ դնէր, և գիտաց զի բազում ժամանակք են այնուհետև, ասէ ցնոսա. Կամի՞ս ողջ լինիլ: Պատասխանի ետ նմա հիւանդն. Տէր, ոչ զոք ունիմ, թէ յորժամ ջուրքն յուզիցին, արկցէ զիս յաւազանն. և մինչ ես դանդաղիմ, այլ ոք քան զիս յառաջագոյն իջանէ: Ասէ ցնա Յիսուս. «Արի՛, ա՛ն զմահիճս քո և գնա»: Եւ ողջացաւ այրն և յարեաւ, էառ զմահիճս իւր և շրջէր. և էր շաբաթ յաւուրն այնմիկ:





Հայր, թո՛ղ դոցա, զի ոչ գիտեն զինչ գործեն:

ԴԱՐՁ ԿԻՊՐԻԱՆՈՍԻ ՀԱՅՐԱՊԵՏԻՆ

Ես Կիպրիանոս ծառայ Աստուծոյ, յԱնտիոք քաղաքէ, ազգաւ Հելլենացի, առն հեթանոսի որդի. անուն հօր իմոյ Եդեսիա, և մօր իմոյ, Կղօղիա ծնօղք իմ նուիրեցին զիս յուսումն դից՝ լինել պաշտօնեայ կոոց, և ետուն զիս յուսումն գիտութեան, և զամենայն ուսայ զկախարդական գիրս առաւել քան զՍիմոն և զՆաքովր, և եղէ հասու ամենայն հնարագիտութեանց. բազում անգամ ելանէի յօղս և կախարդութեամբ զնայի ի վերայ ծովու. և էին ի հրամանս իմ ամենայն գունդք դիւաց. և զոր ինչ խորհէի՝ առ ժամայն կատարէր: Ելանէի յապարանսն և առնէի զշաւիղն արեգականն և զլուսնին յերեսս իմ, և յերեսք իմ

փայլէին իբրև զարեգակն, ես կատարէի զկամս դիւաց մեծաւ ուրախութեամբ, և էի մոլորեալ ի գործ չարութեան և ոչ ճանաչէի զԱստուած, և զամենեւեան գայթակղեցուցանէի յաղագս չար արուեստին իմոյ, զոմանս աչացաւ առնէի, զոմանս գլխացաւ, զոմանս քամոտ, զոմանս ջերմնոտ, զոմանս հիւանդ, զոմանս յազգաց վարէի, զոմանց զգոյն յերեսաց շրջէի, զոմանց միտս մոլորացուցանէի, զոմանս ատելիս առնէի իւրեանց ազգին, զայր ի զկին արկանէի ընդ միմեանս, և տայի նոցա ատել զմիմեանս, և զայլ բազում չարիս դիւականս առնէի ի վերայ երկրի: Եւ այնչափ հմուտ եղէ դիւացն, զի ոչ մնաց գործ և ոչ խորհուրդ, զոր ոչ գիտացի, գիտացի և բազմութիւն դիւաց, զի որպէս ջուր որ ելանէ յաղբերաց՝ այնպէս ելանեն դեք և պատրեն և խաբեն զորդիս մարդկան, զոր Տէր Աստուած հեռացուցէ ի ծառայէս Աստուծոյ:

Եւ կապէի կախարդութեամբ իմով գերկինս, որ ոչ տայր զանձրև. գերկիր, որ ոչ բուսուցանէր զսերմանիս իւր. զարեգակն և զլուսին և զաստեղս հաստատութեան. զծառս, որ ոչ տային զպտուղս. զծովս, որ ոչ տայր զալիս իւր. զձկունս, որ ոչ լողային զծովս. զգետս, որ ոչ գնային. զաղբիւրս, որ ոչ բղխէին. զթռչունս, որ ոչ վերանային յօդս. զանասունս, որ ոչ յղանային, զյղիս, որ ոչ ծնանէին. զկանայս, որ ոչ յղանային. զգեռունս, որ ոչ գեռային. զվաստակաւորս, որ ոչ վաստակէին. զվաճառականս, որ ոչ վաճառէին. զօդն, որ ոչ թնդայր. և կապէի գերկինս օդօքն և գերկիր ամենայն գեռնօք, որ ոչ անցանէին ըստ հրամանս իմ. հազար հարիւր եօթանասուն երկու աղանդք կանանց և կախարդաց, և արանց աղանդաւորաց: Արձակ երիտասարդ մի, որոյ էր անուն Ազդաւղիոս, ցանկացաւ գեղեցիկ կուսի միում, որոյ անունն էր Յուստիանէ,

առնուլ զնա ի կնուլթիւն և ոչ կարէր, և առաքեաց բազում պատուական ինչս, ոսկի և արծաթ և գեղեցիկ հանդերձս, և կոյսն ոչ հաւանեցաւ և դարձոյց անարգանօք. և առեալ երիտասարդն զամենայն ինչս գնաց առ Կիպրիանոս, և նա ասէ. «Ես դարձուցանեմ զնա ի կամս քո»: Եւ առաքեաց զմի ի դիւացն առ Յուստիանէ, և նա սուրբ աղօթիւքն հալածեաց զնա. և ապա առաքեաց զդէն պոռնկուլթեան, և եղեալ դիւրին ի կերպարանս կնոջ պառաւի, և գնացեալ ի դուռն սուրբ կուսին ի գիշերի և ասէ. «Ո՛վ դուստր իմ, զայս գիշեր ընդ քեզ կացից յաղօթս, և մտեալ դէն առ կոյսն և կային յաղօթս զողջոյն գիշերն միաբան». և ապա ասէ սատանայ. «Ո՛վ դուստր, ի կուսուլթենէ ո՞վ իցէ վարձս ընկալեալ: Եւ եթէ չէր ամուսնացեալ, ուստի՞ էին նախահարք, մարգարէք, առաքեալք, հայրապետք. ե՛կ երթիցուք առ մեծն Կիպրիանոս և ամուսնացիր»,

Եւ ապա իմացեալ կուսին եթէ դիւական էր բանն, եհան զնշան խաչին ի վերայ մարմնոյ իւրոյ. և կնքեաց զանձն, և դէն հալածեցաւ և աներևոյթ եղև ասիւ և դողուլթեամբ, և գնաց առ Կիպրիանոս: Եւ Կիպրիանոս ասէ ցդէն. «Զի՞նչ իցէ զի երկիւղիւ դողաս և սասանիս». Ասէ դէն. «Տեսի զնշան խաչին և երկիւղիւ դողամ և սասանիմ»: Ասէ Կիպրիանոս. «Զի՞նչ իցէ նշան խաչին, որ զարհուրեցուցանէ զքեզ»: Ասէ դէն ցԿիպրիանոս. «Երդուիր, զի ոչ ուրանաս մեզ, և ես ասեմ քեզ զամենայն խորհուրդս մեր և զնշան խաչին»: Եւ երդուաւ Կիպրիանոս ի սուտ և ի սնոտի պաշտամունս նոցա՝ եթէ ոչ ուրանամ զձեզ: Եւ սկսաւ դէն պատմել մի ըստ միոջէ զամենայն և ասէ. «Աստուած զմարդ արար ի հողոյ, զԱդամ, և ասէ. “Եկայք հրեշտակք և հրեշտակապետք, երկի՛ր պագէք ձեռակերտին իմում Ադամայ”. Այլ դասք դիւաց հպարտացան և ոչ խոնարհե-

ցան երկիրպագանել Ադամայ: Բարկացալ Աստուածութիւնն և գերկինս պատառեաց և դիւաց գունդս ի վայր ելից, զանթիւ զօրս մեր. և շինեցաք ապարանս և դժոխք անուանեցաք*, և զհոգիս արդարոց և մեղաւորաց մինչև ցՅովհաննէս Մկրտիչ, զամենայն ըմբռնեցաք և ի դժոխս ասաք: Յետոյ առաքեաց Աստուած գՈրդին իւր Միածին, որ եկն և ծնաւ ի սուրբ կուսէն Մարիամայ Աստուածածնէն. զմեռեալս յարոյց, զբորոտս սրբեաց, զկաղս գնացոյց, զկոյրս լուսաւորեաց և զայլ բազում սքանչելիս արար. մատնեցաւ ի Յուդայէ և խաչեցաւ ի հրէից և թաղեցաւ և յարեաւ ի մեռելոց և խաչիւն իւրով լուսաւորէ զամենայն արարածս: Հաւատացեալքն ուրախ լինին և ուրացողք կոծեսցին»:



* Դևի ներկայացրած թյուր փեսակերն է (ծնթ. հրատւ.):



Այս է նշան խաչին, զոր տեսանեմք և զարհուրիմք և սոսկամք: Եւ ապա կիպրիանոս ի միտս իւր եկեալ ասէ. «Եթէ նշան խաչին այդչափ զօրութիւն ունիցի, ապա խաչեալն որչափ ևս առաւել»:

Ես հաւատամ ի Քրիստոս, և ի զօրութիւն խաչին, և յԱստուած Հայր ամենակալ, զի նա միայն է ճշմարիտ Աստուած, և կուռքն դէք են և սատանայ: Եւ ապա այրեաց զամենայն գիրս կախարդութեան իւրոյ, գնաց առ եպիսկոպոսն քաղաքին, և մկրտեցաւ և ձեռնադրեցաւ քահանայ, և զկնի աւուրց՝ եպիսկոպոս, և զաղօթս արար և ասէ. «Տէր Աստուած իմ, սիրեցի զքեզ և ծանեայ ի ձեռն սուրբ հայրապետին Մատթէոսի և Յուստիանեայ

կուսին զգորութիւն խաչի քոյ. ողորմած Աստուած, ողորմեա՛ց ինձ որպէս աւագակին, քաւեա՛ զիս որպէ՛ս զԶաքէոսն, արդարացո՛ զիս որպէ՛ս զմաքսաւորն, հա՛ն զիս ի գբոյ մեղաց՝ որպէս Երեմիա և զԴանիէլ ի գբոյ բանտէն, շիջո՛ յինէն զբռնութիւն թշնամւոյն՝ որպէս զհոլր երից մանկանց ի Բաբելոնի հողմաբեր ցօղովն օրհնութեան»:

Եւ զոր յառաջն կապէի չար և դիւական աղանդօք, այժմ արձակեալ եմ զամենայն կապեալսն հրամանաւն Աստուծոյ. կացցեն երկինք և երկիր ի հաստատութեան իւրեանց, հող զբոյս դալար բուսուսցէ, ծառք զպտուղս իւրեանց տացեն, և ամենայն կապեալքն արձակումն առցեն յանուն ամենասուրբ Երրորդութեանն Աստուծոյ:

Երդմնեցուցանեմ զքեզ, սատանայ, անուամբն Աստուծոյ Յիսուսի Քրիստոսի Տեառն մերոյ, և ի հազար և մի անունն Աստուծոյ, որ զԱդամն և զԵւայ բարկա-

ցոյց, և զինն դասս հրեշտակաց, որ ելանեն և իջանեն յԱդրիոպոլիս քաղաք, և յանուն սերովբէից, որ կան ի սպասաւորութիւն Որդւոյն Աստուծոյ, և սքողելով ծածկեն զերեսս իւրեանց և երգեն՝ Սուրբ, Սուրբ, Սուրբ, Տէր զօրութեանց, լի են երկինք և երկիր փառօք քո:

Երդմնեցուցանեմ զձեզ, դեք չարք և որդիք սատանայի, որ էք օգնական ամենայն կախարդաց և չարագործաց. երդմնեցուցանեմ զձեզ դեք ի գեղեցկութիւն Ադամայ, ի վայելչութիւն դրախտին, ի խոնարհութիւն ամենայն սրբոց, և ի սէր ամենայն մարտիրոսաց, ի պատարագն Աբելի ի կոչել զանուն տեառն Ենովսայ, յարդարութիւն Նոյի, ի քահանայութիւն Մելքիսեդեկի, ի հաւատս և ի հիւրընկալութիւն Աբրահամու, ի կապանսն Իսահակայ, ի պատրանս Յակովբայ, ի գեղեցկութիւն Յովսեփայ, ի համբարձում Եղիայի, ի հնազանդութիւն Եղիսէի, ի տախատակն Մովսիսի, ի պատմուծանն

Ահարովնի, որ զարդարեալն էր երկոտասան աղամբք, որ օրինակ էին երկոտասան առաքելոցն Քրիստոսի. ի քնարն և ի Սաղմոսն Դաւթի, ի մատանին Սողոմոնի, ի գաւազանն Մովսիսի, և յաղօթսն Ահարովնի, յաւետիսն Գաբրիէլի, զոր ետ սուրբ կուսին Մարիամու. ի ծնունդն և ի մկրտութիւն Յիսուսի Քրիստոսի, որ մկրտեցաւ ի Յորդանան ի Յովհաննէ, և ի սուրբ հրամանսն, որ հրամայեցին անդամալուծին, թէ՛ Արի՛, ա՛ն զմահիծսքո, և ի թուքն, որ եբաց զաչս կուրին, և ի գալուստն յաւանակաւ յԵրուսաղէմ, ի յարութիւնն Ղազարու, ի մատնումն և ի խաչելութիւն Քրիստոսի, ի գեղարդն և ի բեւոն Քրիստոսի, ի փշեղէն պսակն և ի հեղումն արեան Որդւոյն Աստուծոյ, որ հեղաւ ի վերայ սրբոյ Խաչին:

Երդմնեցուցանեմ և կապեմ և հալածեմ զձեզ, դեք չարք, յարութեամբն Քրիստոսի, և ի գալուստն Հոգւոյն Սրբոյ, և այլակերպութեամբն Քրիստո-

սի, որ այլակերպեցաւ ի Թափոր լերին. ոչ ունիք իշխանութիւն դեք և աղանդք և կախարդութիւնք արանց և կանանց մերձեցեալ ի ծառայս Աստուծոյ:

Երդմնեցուցանեմ զձեզ ի բանն անսպառ, ի լոյսն անճառ, ի թագն անպատում, որ հրեշտակացն զարհուրելի, ի թագաւորն սոսկալի, ի մատանին Սողոմովնի, ի կապանսն պղնձիս, ի տախտակն Մովսիսի՝ գրեալ մատամբն Աստուծոյ, յաղօթսն Ահարովնի, ի պատմուճանն ցանկալի, ի սուրբն Սինա, ի քառասնօրեայ պահս Մովսիսի՝ ի սուրբ արիւն մանկանցն Բեթղեհէմի, յարդարութիւն Նոյի, ի հաւատս Ղովտայ, ի կարգն Մեղքիսեղեկի, յաւետիսն Գաբրիէլի, յաթոռն չորեքկուսի, որոյ մի կողմն մարդոյ էր նման իմաստնոյ և բանաւորի, մին ի կերպարանս էր առիւծու, որոյ տեսիլն հուր կիզելի, մին ահեղ և սքանչելի և զտեսիլ հրեղէն եզին ունէր, միւսն ունէր զթև արծուոյ ահաւոր

տեսլեամբ քան զամենայն և զարմանալի, որոյ վերայ նստեալ բազմէր Տէրն և Աստուած ամենայնի. ուր այս անուանք սուրբք յիշեսցին, զիրք և հրամանք պատահին, չարն ի բաց միշտ հալածի, կապանք և յուռութք լուծանին ի ծառայից Աստուծոյ. ամէն:

Յոյց մեզ, Տէր, զողորմութիւնս քոյ և զփրկութիւնս քո տո՛ւր մեզ:

Որպէս զի մեծ են գործք քո, Տէր, և յոյժ խոր են խորհուրդք քո:



ԱՂՕԹՔ

Երանելոյն Յովհաննու Գառնեցոյ
ասացեալ առ սուրբ Աստուածածինն

Աստուածածին մայր Քրիստոսի և ծնող միածնի Հօր, բարձող անիծից և պարծանք ազգի մարդկան: Յերկնային զօրացն երանեալ և ի հողեղինացս օրհնաբանեալ, միջնորդ Աստուծոյ և մարդկան, հաշտարար ընդ արարածս, թագ և պսակ կուսից և համարձակ բարեխօս վասն ազգի մեղաւորաց: Մեղուցեալս ամենայնի անկանիմ առաջի քո և աղաչեմ զքեզ իբրև զնոյն ինքն զմարմնացեալն ի քէն, բարեխօսեա՛ վասն իմ առ Բանն Աստուած, զոր ծնար մարմնով, զոր կերակրեցեր զկերակրիչն ամենայն կենդանեաց:

Աղաչեա՛ վասն մեր զանդերանիկդ քո: Կացո՛ կանգուն առաջի նորա ցուցմամբ սուրբ ստեանցդ: Կացո՛ առաջի նորա միջնորդ և բարեխօս զմանկութիւն իւր՝ կաթամբ սնանիլն որպէս մանուկ, զուսովդ բառնիլն, զգրկօք գգուիլն, շրթամբք համբուրիլն, զողջագուրիլն որպէս տղայ, գերթ և գեկն քո ընդ նմա, յԵգիպտոս և ի Նազարէթ և յամենայն տեղիս, զտրտմութեամբ տազնապիլն քո վասն նորա ի ժամ չարչարանացն, զյանձնարարութիւն քո առ Յովհաննէս, յորժամ հեղուսեալ կայր վշտօք ի վերայ Խաչին, զդառն արտասուան քո, զոր վտակօրէն հեղուիր, յորժամ տեսանէիր զնա վտանգեալ ի վերայ խաչին, վասն որոյ մատնատատան տառապէիր կսկծակոծ վասն չարչարանացն, վասն սաստիկ ծարաւմանն, վասն ճաշակման լեղւոյն՝ քացախին, վասն տեսանելոյն զքրտնատեսակ արեան իջումն, վասն իջուցանելոյն ի Խաչէն արիւնագանգ մարմնովն,

վասն դիագարդեալ դնելոյն ի սուրբ գերեզմանն:

Աղաչեմ զքեզ, մայր լուսոյ, հայցեա՛ զթողութիւն մեղաւորիս: Դի՛ր աղերս առաջի նորա զամենակիրս չարչարանաց իւրոց, զոր վասն իմ կրեաց բարերարն և մարդասէրն: Յիշեցո՛, սուրբ կոյս, զայսքան չարչարանացն, զի թերևս ողորմեսցի և ներեսցէ բազմամեղիս և ջնջեսցէ զձեռագիր իմոց յանցանաց: Եւ իւր անմեղ մասամբն և սուրբ արեամբն դրոշմեսցէ զգրեալս ի դպրութիւն կենացն անվախճանից ընդ ամենայն սուրբս իւր:

Եւ քեզ երկրպագութիւն ի մեղուցեալ ոգւոյս, ամենասուրբ կոյս, բարեխօս լե՛ր ծառայիս Աստուծոյ. ամէն:



Երանելոյն Յովհաննու Գառնեցոյ
վասն ճանապարհի

Առաջնորդ կենաց, ճանապարհ ճշմարտութեան Տէր մեր Յիսուս Քրիստոս: Որ առաջնորդեցեր Յովսեփայ յեգիպտոս, և Իսրայելացւոց ընդ ծովն Կարմիր, և Մովսիսի ի լեառն Սինէական, և ժողովրդեանն յերկիր պարգևացն, և Կղէովպասանցն ճանապարհակից եղեր յէմմաւոս:

Աղաչեմ զքեզ, Տէր, առաջնորդեա՛ ինձ և եղբարց իմոց գնալ խաղաղութեամբ զառաջիկայ ընթացս, փրկեա՛ յերևելի և յաներևոյթ թշնամւոյն, և բարի առաջնորդեա՛ ի դէմ եղեալ ի տեղին, զի դու ես ճանապարհ և ճշմարտութիւն և կեանք մեր և քեզ փառք և երկրպագութիւն այժմ և միշտ և յաւիտեանս յաւիտենից:

ՎԱՄՆ ԶԱԲԱԿ ԾՆԱՆԵԼՈՅ

Աստուած բոլորից, անճառ մեծութիւն, հզօր զօրութիւն, ամենակարող բարերարութիւն: Առ քեզ հայի ամենայն ակն տեսողի: Նայեաց ի պաղատանս հառաչման ձայնի քոյոց ծառայից և աղախնեայց, որպէս Աննայի լուար հեծութեան, և ետուր նմա զմեծն Սամուէլ, և Յովակիմայ և Աննայի զամենաօրհնեալն Մարիամ, և Զաքարիայի և Եղիսաբեթի պարգևեցեր զաւակ զսուրբ Կարապետն և զՄկրտիչն Յովհաննէս: Նոյն ողորմութեամբդ քո պարգևեա՛ և տո՛ւր սոցա զաւակ բարի ծառայիս Աստուծոյ. ամէն:

Զայնն բարբառոյ յանապատի,
Ս. Յովհաննէս դու ամլորդի,
Անմեղ զառինն անապատի,
Վկայ եղեր դու կրկնակի:

Բարեխօսութեամբ սրբոց մարգարէիցս Մովսիսի և Ահարովնի, Նաթանայ և Սամուէլի, Դաւթի, Ամովսայ, Միքիասայ, Աբդիասայ, Յովնանու, Նաւում ընդ Ամբակումայ, Սոփոնիայ և Անգէի, Մաղաքիա ընդ Դանիէլի, Զաքարիա ընդ Եզեկիէլի, և ամենայն սրբոց դասուպահապան լիցին ծառայիս Աստուծոյ ամէն:



ԱՂԵՐՍ
ԱՌՍ. ՍՏԵՓԱՆՈՍ ՆԱԽԱՎԿԱՅՆ

Ի քէն հայցեմք արտասուագին,
Նախավկայ Տեառն արարչին,
Ս. Ստեփանոս բացող երկնին,
Տեսող զՅիսուս յաջմէ ծնողին,
Լե՛ր բարեխօս արեամբ քոյին
Տալ մեզ հանգիստ ի յանկողնին,
Արթուն լինիլ յառաւօտուն,
Բարեբանեալ զլոյսն անքնին:



ԱՂՕԹՔ
ԶՕՐԱԲՈՐ ԱՌ ԵՐԿՆԱՅԻՆ ԶՕՐՍ

Անեղ անմահ Արարչին սպասաւորք անմարմինք՝ վերին զօրացն դասապետութիւնք: Աթոռք, Քերովբէք և Սերովբէք, Տէրութիւնք, Զօրութիւնք և Իշխանութիւնք, Պետութիւնք, Հրեշտակապետք և Հրեշտակք, Միքայէլ և Գաբրիէլ, Պետք վերնական զօրացն դասուց, որք անլուելի ձայնիւ փառաբանութիւն մատուցանէք ամենասուրբ Երրորդութեանն, և երեքսրբեան ձայնիւ եղանակէք զերգս՝ ասելով. «Ողորմեա՛, դո՛ւ ստեղծեր մի՛ կորուսաներ, զգործս ձեռաց քոց մի՛ անտես առներ»: օգնական և պահապան լերո՛ւք ծառայիս Աստուծոյ. ամէն:



ԱՂՕԹՔ
ԱՌ ՍՈՒՐԲ ԶԻՆԱԲՈՐՍ ՔՐԻՍՏՈՍԻ

Բարեխօսութեամբ սուրբ զօրավարացն, սրբոյն Սարգսի զօրավարին և որդւոյ նորա Մարտիրոսին, և սրբոյն Թէոդորոսի զօրավարին, Գէորգայ զօրավարին և Մերկերիոսի զինաւորին. Անդրէի զօրավարին, և չորից զինուորացն՝ Բասոսի, Եւսեբի, Եւտիքի և Բասիլիդեայ, սրբոյն Մինասայ, Երմոզինեայ և Գրաբոսի, և սրբոց Ատովմեանց, Ոսկեանց, և Սուքիասանց, Խարիթեանց և այլ ամենայն սրբոց բարեխօսութեամբն պահեա՛ զծառայս քո. ամէն:



ԱՂՕԹՔ
ՎԱՄՆ ԱԿԱՆ ՉԱՐԻ
ԵՒ ԼԵԶՈՒԻ ՉԱՐԻ

Տէր Աստուած մարդասէր, մարդասիրի Հօր Որդի, դու ես պահապան և օգնական յուսացելոցս ի քեզ ողորմութեամբ քո ի ծառայս, և պահեա՛նք անփորձ ի չարէ և անսայթաք յորոգայթէ երևելի և աներևոյթ թշնամւոյն. պահեա՛ ի չար աչաց և ի չար լեզուէ, ի սրոյ և յամենայն հարուածոց երևելեաց և աներևութից պահեա՛ զծառայս քո. ամէն:



ԱՂՕԹՔ
ՍՐԲՈՅՆ ԳՐԻԳՈՐԻ ԼՈՒՍԱՒՈՐՉԻ

Աղաչեմ զքեզ, Քրիստոս փրկիչ աշխարհի, հայեա՛ յիս և ողորմեա՛ և շնորհեա ներումն բազում անօրէնութեան իմոյ, քանզի անարգեցի զամեայն բարիսն, զոր արարեր ինձ ի մանկութենէ իմմէ, զի զտխմարս և զանիմաստս արարեր անօթ գիտութեան:

Յաճախեաց յիսն շնորհքն քո և լցոյց զքաղց իմ և զծարաւ իմ զովացոյց, և լուսաւորեաց զխաւարեալ միտս իմ, և ժողովեաց ի մոլորութենէ զխորհուրդս իմ և ելից ի ծոց իմ, վասն որոյ անկեալ երկիրպազանեմ առաջի քո՝ խոստովան եղեալ զբարերարութենէ քումմէ, և աղաչեմ, դադարեցո՛ առ իս զխոստումն շնորհի քոյ, և պահեա՛ զնա ի գանձի քում, զի դարձեալ տացես ինձ զնա յաւուրն յայն-

միկ: Մի՛ բարկանար ինձ, մարդասէր, զի ոչ հանդուրժեմ սպառնալեաց քոց, յաղագս որոյ և աղաչեմ ժտելով, զի առաւել քան զչափն յաճախեաց յիս շնորհն քո, վասն զի և լեզու իմ տկարացաւ՝ ոչ կարելով խօսել զնմանէ, հիացան և միտք իմ՝ ոչ բերելով զբազմութիւն ալեաց նորա: Կերպարանք և ճառագայթ օրհնելոյ Հօրդ, դադարեցո՛ւ առ իս հոսանաց նորա, զի իբրև զհօւր բորբոքեալ բոցակիզեցէ զերիկամունս իմ և զսիրտ իմ. և անդր դարձեալ պարգևեա՛ ինձ զնա և կեցո՛ զիս յարքայութեան քում. մի՛ յիշեր զանօրէնութիւնս իմ. յանդգնիմ և հայցեմ, տո՛ւր ինձ զխնդրուածս իմ և արա՛ առ իս օթևան օրհնեալ Հարբ քով յաւուր յայտնութեան քոյ. շնորհեա՛ ինձ, Քրիստոս, զհայցուածս իմ, զի դու միայն ես տուիչ կենաց իմոց, և քեզ ընդ Հօր Հոգևովն Սրբով փառք այժմ և յաւիտեանս. ամէն:

ՄԱՂԹԱՆՔ ԱՌ՝ ՍՈՒՐԲ ԼՈՒՍԱԲՈՐԻՉՆ ՄԵՐ

Լուսաւորիչ հայր պարծանաց,
Ընկա՛լ զբանս զայս մաղթանաց
Եւ աղաչեա՛ զհայրն փառաց՝
Ջնջել զգիր մեր յանցանաց:

Այլ և բարեխօսութեամբ երեք հարիւր
ուրթ և տասն հայրապետացն և ուղղափառ եպիսկոպոսացն աղօթիւք պահեա՛,
Տէր Աստուած, զծառայս քո. ամէն:



ԱՂՕԹՔ
ԱՌ ԴՐԱՆ ՍՈՒՐԲ ԵԿԵՂԵՑԻՈՅ
Ս. ՅՈՎՀԱՆՆՈՒ ՈՍԿԵՔԵՐԱՆԻ

Տաճար Աստուծոյ և բնակարան Սուրբ Հոգւոյն, ի քէն սուրբ աւագանան կոչեաց յորդեգրութիւն Հօրն երկնաւորի: Այսօր ի քեզ կամեցաւ պատարագել գառն անարատ: Եւ ես դիմեալ եկի առ դուրս քո և աղաչեմ զքեզ, մաքրեա՛ զիս վերստին լուացմամբ և սրբեա՛ ի մեղաց և արա՛ արժանի մտանել առաջի սրբոյ սեղանոյդ յերկրպագութիւն:



ԲԱՆ ԻԸ.

Սրբոյն Գրիգորի Նարեկացոյն
ընդդիմամարտի դիւաց այս նուագ աղօթից
և դիւասարսուռ ջերմնարագնապ
ախարատութեանց Աստուծով փարսպիչ

Արդ, այսքանեաց անբաւից հրաչից հանդերձից Հա՛յր ամենաստեղծ. անունդ ահաւոր, ձայն սարսափելի, կոչումն ընտանի, բան համբուրելի, ազդումն սքանչելի, հրաման սոսկալի, էութիւն անքննելի, գոյութիւն անճառելի, իսկութիւն անբաւելի, զօրութիւն անզննելի, կամք ամենաբարի, տէրութիւն անսահմանելի, մեծութիւն անչափելի, բարձրութիւն անբովանդակելի, որքանութիւն անկշռելի, առաւելութիւն անհասանելի, պատճառ Որդւոյ հայրութեամբ, այլ ոչ նախադրութեամբ:

Քե և ի ձեռն քոյդ անպարտագիր զօրութեանդ սաստեա՛ տագնապող և դիւական տենդիս ջերմութեամբ, որ սպրդեալ մոծաւ ընդ մեղաց, զի փախիցէ ի մարդոյս՝ զարհուրեալ ի սխրալի և անբաւելի արեան վտակի գառինդ երկնաւորի, որով սրսկեալ միանգամ ի մշտնջենաւորս համայն մաքրեցաք: Եւ արդ՝ յայս պատկառելի խոնարհութենէ արարչակերտս խորհրդոյ՝ ամաչեսցէ սատանայ ի գործս չարեաց իւրոցն հրեշտակաց: Տանջեսցի և հալածեսցի, հեռացեալ և արտաքս առաքեալ ի շինուածոյ խորանէ քումդ բնակութեան յարտաքին խաւարն: Եւ ջնջեալ մաքրեա՛ զարտասուս ողբոցս ի դիմաց մերոց և զհառաչումն ձայնիս հեծութեան ի սրտից մերոց: Եւ յիշատակաւ հարման հեղուսիցն, քստմնափուշ, տաժանատեսիլ ոգեպահանջից, որով պնդեցաւ Միածինդ քո յաշտարակ Խաչին, ցաւեսցի՛ չարին: Եւ ի կողահերձ սայրասուք սլաքէ ուժգին

բաղխմանէ, որով զվէրն մեծ ընկալաւ, ի սպառ սատակեսցի սկզբնարանն մահու: Եւ զի խոնարհեցոյց զգովեալն գլուխ յաւանդել զոգին ի ծոց քո, բարձրեա՛լ, ապստամբութիւն անբարի բարուցն բելիարայ ի կոր կործանեսցի ամենայնիւ հերքեալ ի կորուստ: Եւ զի ղօղեալ ծածկեցաւ անմահն իսկութիւն յորովայնի երկրի, այսու ամենաբարձրեալն հպարտութիւն կարծեալ գոռոզին ի յատակս մահու դժոխոց մթին ստուերին յառեալ դիտեսցէ: Եւ յիշեսցէ զառաջին հարուածն անբժշկական, որով մահացու դիմամարտութիւն թունից վիշապին՝ կենարարն կրիւք ամենագօրին: Վասն զի ի փառս քո, Հա՛յր ողորմութեան, իբր ի գովեստ Որդւոյ քո Հոգւովդ Սրբով զայս խոստովանիմ: Քան զի ոչ պիտակինչ սոսկ զօրութեանն ունի զմիւսէն՝ առ մի խորհրդականն խորութեան: Այլ զանսկիզբն բանդ անձնաւոր ընդ անժամանակդ Հօր փառաւորեմք: Եւ քեզ

միայնոյ Սուրբ Երրորդութեանդ, հա-
լասարապատիւ տէրութեանդ, համբուն
անբաժին ինքնութեանդ՝ օրհնաբանու-
թիւն, գոհութիւն, զօրութիւն, և անճառ
վայելչութիւն մեծութեան, բարեվիճակ
հարթութեան, զուգակշիռ հալասարու-
թեան յաւիտեանս. ամէն:



ՄԱՂԹԱՆՔ
ՄՐԲՈՅՆ ԳՐԻԳՈՐԻ ՆԱՐԵԿԱՅԻՈՅ
ԶՕՐԱԲՈՐ ԸՆԴԴԷՄ ԱՄԵՆԱՅՆ ՉԱՐԵԱՅ

ԲԱՆ ԺԲ.

Ընկալ քաղցրութեամբ, Տէր Աստուած
հզօր, զղառնացողիս զաղաչանս: Մա-
տի՛ր գթութեամբ առ պատկառեալս
դիմօք: Փարատեա՛, ամենապարգև,
զամօթական տխրութիւնս: Բա՛րճ յինչն,
ողորմած, զանբերելի ծանրութիւնս:
Անջրպետեա՛, հնարաւոր, զմահացու
կրթութիւնս: Աւարեա՛, միշտ յաղթող,
զխաբողին հաճութիւնս: Բացադրեա՛,
վերնային, զմոլելոյն մառախուղ:
Կնքեա՛, կեցուցիչ, զկորուսչին ընթաց-
մունս: Տրուեա՛, ծածկատես, զըմբռնո-
ղին չար գտմունս: Խորտակեա՛, անքնին,
զմարտողին դիմեցմունս: Տեառնագրեա՛

քո անուամբդ զլուսանցոյց երդ յարկիս: Պարփակեա՛ քո ձեռամբդ զառատաղ տաճարիս: Գծագրեա՛ քո արեամբդ զմուտ սեմոց սենեկիս: Կերպացո՛ զքո նշանդ ի հետ ելից մաղթողիս: Ամրացո՛ քո աջովդ զհանգստեանս խշտիս: Մաքրեսցես ի յաղբից զծածկարան անկողնոյս: Պահեսցես քո կամօքդ զտառապեալ անձն ոգւոյս: Անխարդախ արասցես զքո շնորհեալ շունչ մարմնոյս: Կացուցես շրջափակ մարմնոյս: Կացուցես շրջափակ զպար զօրոյդ երկնայնոյ:

Կարգեսցես ի դիմի ընդդէմ դիւացն դասու: Տո՛ւր հանգիստ բերկրութեան, մահահանգոյնս նիրհման ի խորութեան գիշերիս: Բարեխօսութեամբ հայցուածոց սրբուհւոյ Աստուածածնիդ և ամենայն ընտրելոց: Ամփոփեալ պարուրեա՛ զպատուհան տեսութեանց, զգայարանցս իմաստից, անգարհուրելի զետեղմամբ, ի ծփական խռովութեանց, կենցաղական զբաղմանց, անըջական երազոց, խօլա-

կանաց ցնորից: Յիշատակաւ քո յուսոյդ անվնասելի պաշտպանեայ, և սթափեալ վերստին ի ննջմանէ ծանրութեան, ամենազգաստ արթնութեամբ, հոգենորոգ զուարթութեամբ ի քեզ արձանացեալ՝ զայս ձայն մաղթանաց բուրմամբ հաւատոց, քեզ ամէնօրհնեալ թագաւորդ փառաց անճառից, փառաբանողաց երկնագուճար խմբից երգակցեալ՝ յերկինս առաքել: Զի դու փառաւորեալ ես յամենայն արարածոց յաւիտեանս յաւիտենից. ամէն:



ԱՂՕԹՔ
ՍՐԲՈՅՆ ԳՐԻԳՈՐԻ ՆԱՐԵԿԱՅԻՈՅ

ԲԱՆ ԽԱ.

Որդի Աստուծոյ կենդանւոյ, օրհնեալդ յամենայնի Հօրդ ահաւորի անքնին ծնունդ, որ տկարանայ առ ի քէն և ոչ ինչ. որ ի ծագել անստուեր նշուլից ողորմութեան քո փառաց՝ հալին մեղք, հալածին դւք, ջնջին յանցանք, խզին կապանք, խորտակին շղթայք, կենդանածնին մահացեալք, բժշկին հարուածք, ողջանան վէրք, բառնին ապականութիւնք, տեղի տան տխրութիւնք, նահանջին հեծութիւնք, փախնու խաւարն, մեկնի մէգն, մերժի մառախուղն, փարատի մռայլն, սպառի աղջամուղջն, վերանայ մութն, գնայ գիշերն, տարագ-

րի տագնապն, չքանան չարիքն, հալածին յուսահատութիւնքն, և թագաւորէ ձեռն քո ամենակար, քաւիչդ ամենայնի: Որ ոչ եկիր կորուսանել զմարդկան ոգիս, այլ կեցուցանել: Թող ինձ զանթիւ չարիսն իմ բազում ողորմութեամբդ, զի դու միայն ես յերկնի անճառ և յերկրի անգնին, ի տարր գոյի և յեզրս ծագաց աշխարհի, սկիզբն ամենայնի և յամենայնի ամենայն լրմամբ օրհնեալդ ի բարձունս: Եւ քեզ ընդ Հօր և Հոգւոյդ Սրբոյ փառք յաւիտեանս. ամէն:



ԱՂՕԹՔ
ՍՐԲՈՅՆ ԳՐԻԳՈՐԻ ՆԱՐԵԿԱՅԻՈՅ

ԲԱՆ ՂԴ.

Աստուած յաւիտենական, բարերար և ամենակալ, ստեղծիչ լուսոյ և յօրինիչ գիշերոյ, կեանք ի մահու և լոյս ի խաւարի, յոյս ակն ունողաց և երկայնմտութիւն տարակուսելոց, որ ամէնարուեստ իմաստութեամբ քով դարձուցանես յայգ զստուերս մահու, աննուագ ծագումն և անմուտ արեգակն, քան զի ոչ զօրէ ծածկել զփառս տէրութեան քոյ խաւար գիշերոյ: Որում կրկնի ծունր երկրպագութեան ամենայն եղելոց, երկնաւորաց և երկրաւորաց և սանդարամետականաց. որ լսել զհեծութիւն կապելոց և հայիս յաղօթս խոնարհաց և ընդունիս զխնդրուածս նոցա, Աստուած

իմ և թագաւոր իմ, կեանք իմ ապաւէն իմ, յոյս իմ և վստահութիւն իմ, Յիսուս Քրիստոս Աստուածդ ամենայնի, սուրբդ հանգուցեալ ի հոգիս սրբոց, մխիթարութիւն վշտաց և քաւարան մեղուցելոց, որ գիտես զամենայն յառաջ քան զլինել նոցա, առաքեա՛ զպահպանողական զօրութիւն աջոյ քոյ և փրկեա՛ զիս յերկիւղէ գիշերի և ի դիւէ չարէ: Որպէս զի զյիշատակ սոսկալի և սուրբ քոյ անուանդ միշտ համբուրեալ չրթամբք հոգւոյ ըղձութեան շնչոյ, կեցից պահպանեալ ընդ այնոսիկ, որք կարգան գքեզ ի բոլոր սրտէ: Եւ ի դրոշմէ Խաչի քոյոյ նշանիդ, զոր աստուածային արեամբ քով ներկեալ նորոգեցեր, և ի նոյն շնորհ որդեգրութեան զմեզ մկրտեցեր, և ի փառս պատկերի քոյ նկարեալ յօրինեցեր, այսու պարգևօք աստուածականօք ամաչեսցէ սատանայ, քակտեսցին մեքենայքն, բարձին որոգայթքն, պարտեսցին մարտուցեալքն, պակասեսցին

զէնքն սայրասուրք, մերժեսցին մէզն,
փարատեսցի խաւարն, մեկնեսցի մառա-
խուղն: Բագուկ քո հովանասցի, և աջ քո
կնքեսցէ, վասն զի գլթած ես և ողորմած,
և անուն քո կոչեցեալ է ի վերայ ծառա-
յից քոց: Եւ քեզ ընդ Հօր Հոգևովդ սրբով
փառք և իշխանութիւն յաւիտեանս յա-
ւիտենից. ամէն:



ԱՂԵՐՍ ԱՌՍՈՒՐԲ ԱՌԱՔԵԱԼՄՆ

Անմահ գառին հզօրի,
Որ միշտ զենեալ և կենդանի,
Երկոտասան գառանցդ խմբի,
Զեզ այս աղերս մատուցանի:

Սուրբ Պետրոսի և Անդրէի,
Երկու եղբարց նախակոչի,
Յակոբոսի, Յովհաննիսի,
Զկնորս որդիքն Զերեթի:

Փիլիպպոսի, Բարթոլղիմէի,
Թովմայի և Մատթէոսի,
Յակոբ Ալփեայ Թադէոսի,
Շմաւոնի, Մատաթէի:

*Երկոտասան առաքելոց,
ի Քրիստոսէ պսակելոց:
Այս են բաղձանք սրտից մերոց.
Փրկել զմեզ յայսոց պղծոց:
Եւ լիցի պահապան ծառայիս
Աստուծոյ. ամէն:*




**Պարծանք հաւաքացելոց ի Քրիստոս և
գովեստ սրբոյ Խաչին,
որ երևեցաւ յԵրուսաղէմ յաւուրս
Կիրոզի հայրապետին. Մայիսի Է.**

*Խաչն քրիստոնէից յոյս, Խաչն կուրաց
առաջնորդ, Խաչն մոլորելոց դարձուցիչ,
Խաչն աղքատաց մխիթարութիւն, Խաչն
մեծատանց սանձ, Խաչն ամբարտաւա-
նից քակտումն, Խաչն ախոյեան դիւաց,
Խաչն բանսարկուին յաղթութիւն, Խաչն
դաստիարակ, Խաչն աղքատաց մեծու-
թիւն, Խաչն անյուսից յոյս, Խաչն նաւա-
վարաց նաւապետ, Խաչն տագնապելոց*

հանգիստ, իսաչն պատերազմողաց պարիսպ, իսաչն հայր սրբոց, իսաչն վերակացու այրեաց, իսաչն անիրաւաց դատաւոր, իսաչն արդարոց խորհրդակից, իսաչն նեղելոց հանգիստ, իսաչն տղայոց պահապան, իսաչն արանց գլուխ, իսաչն ծերոց կատարումն, իսաչն խաւարելոց լոյս, իսաչն թագաւորաց վայելչութիւն, իսաչն զէն յաւիտենական, իսաչն բարբարոսաց ազատութիւն, իսաչն անխրատից իմաստութիւն, իսաչն անօրինելոց օրէնք, իսաչն մարգարէից քարոզ, իսաչն առաքելոց պատմութիւն, իսաչն մարտիրոսաց պարծանք, իսաչն վանականաց պահապան, իսաչն կուսանաց զգաստութիւն, իսաչն քահանայից ուրախութիւն, իսաչն եկեղեցւոյ հիմն, իսաչն տիեզերաց զգուշութիւն, իսաչն մեհենից աւերիչ, իսաչն բազնեաց կործանիչ, իսաչն ճենճերաց ապականիչ, իսաչն հրէից գայթակղութիւն, իսաչն ամբարշտաց կորուստ, իսաչն տկարաց զօրութիւն, իսաչն հիւան-

դաց բժշկութիւն, իսաչն բորոտաց սրբիչ, իսաչն անդամալուծից ուղղիչ, իսաչն պագշտոց բժշկութիւն, իսաչն քաղցելոց հաց, իսաչն ծարաւելոց աղբիւր, իսաչն մերկաց վերարկու, իսաչն անբարբառ բարեխօս ծառայիս Աստուծոյ. ամէն:



ԱՆՈՒԱՆՔ ՍՈՒՐԲ ՆՇԱՆԱՅՆ,
ՈՐՔ ԵՆ ԲԱՐԵԽՕՍ ՎԱՄՆ ՄԵՐ

Բարեխօսութեամբ Աստուածային սուրբ նշանին և անբարբառ բարեխօսին Քրիստոսի վասն ազգի մարդկան՝ սրբոց կենաց Խաչափայտին Քրիստոսի, Աւագակին սուրբ նշանին, Վարագայ սուրբ նշանին, Երևման սուրբ նշանին, Հաղբատայ սուրբ նշանին, Վանկոյ սուրբ նշանին, Կողբայ սուրբ նշանին, Աղինեայ սուրբ նշանին, Սերեխոյ սուրբ նշանին, Մառառայ սուրբ նշանին, Գանձասարայ սուրբ նշանին: Եւ Քրիստոսի սուրբ գեղարդին, Գետարգել սուրբ նշանին, Ապարանից սուրբ նշանին, Կարմրակ սուրբ նշանին, Աքանչեւագործ սուրբ նշանին, Ծիծռան սուրբ նշանին, Աղթամարայ սուրբ նշանին, Սանահնու սուրբ նշանին, Կիպրոսի սուրբ նշանին, Վարոսի սուրբ նշանին, Կոստանդիանո-

սի սուրբ նշանին և Տապանակի սուրբ նշանին, Վրաց Հոռոմոց սուրբ նշանին, Կոստանդնուպոլսոյ սուրբ նշանին, Հապէշու և Խպտոյ սուրբ նշանին, Հացունեաց սուրբ նշանին, որ ի գալստեանն յառաջագոյն: Գայլակլայ սուրբ նշանին, Հնդու սուրբ նշանին, Կապնկայ սուրբ նշանին, Պիզեու սուրբ նշանին, Հոփսիմէի սուրբ նշանին, Բոգու սուրբ նշանին, Սարի սուրբ նշանին: Եւ այլ ամենայն սուրբ նշանացն, որք յընդհանուր տիեզերս իցեն՝ սոցին սուրբ և արժանաւոր աղօթիւքն և անբարբառ բարեխօսութեամբն ողորմեա՛ ծառայիս քոյ:



ՆՐԱՇԱԳՈՐԾՈՒԹԻՒՆ ԲՐԻՍՏՈՍԻ
ԶՈՐ ԱՐԱՐ

Եւ Քրիստոս բժշկեաց ի ժողովրդենէ բազում հիւանդս, լուսաւորեաց զկոյրս, հալածեաց ի մարդկանէ զդևս, սրբեաց զբորոտս, զնացոյց զանդամալոյծն, որ ի Բեթհեզզայ անկեալ դնէր երեսուն և ութ ամ, և յարոյց ի մեռելոց զչորեքօրեայ մեռեալն և այլ անթիւ սքանչելիս և հրաշագործութիւնս արար: Նոյն ողորմութեամբն իւրով հեռի արասցէ ի մէնջ զգլխացաւն, զաչաց ցաւն, զականջացաւն, զատամանց ցաւն, զսրտացաւն, զմիջաց ցաւն, զկշտացաւն, զխիթն որովայնի, զծնկացաւն, և յամենայն ցեղ ցաւոց ազատեսցէ և օգնական և պահապան լիցի ծառայիս Աստուծոյ. ամէն:



Վերստին յաւելուած կրկին հեծութեան
նորին հսկողի առ նոյն աղերս
մաղթանաց բանի

Ի ԽՈՐՈՅ ՍՐՏԻ ԽՕՍՔ
ԸՆԴ ԱՍՏՈՒԾՈՅ
ԲԱՆ ԶԴ.

Ա. Արքայ երկնաւոր, թագաւոր բարձրեալ, Տէր բոլորից, ամենից ակնկալութիւն, ստեղծող տեսականաց, հաստիչ իմանալեաց, պատճառ եղանութեանց, կազմիչ հանդերձելոց, տուիչ լուսոյ, առիթ առաւօտու, պատրաստիչ վաղորդայնի, երևեցուցիչ յերեկոյի, տարրիչ խաւարի, արուեստաւոր բարեհնար, իմաստութեան գործոնեայ, քաւարան օրհնեալ, հալիչ մեղանաց, հալածիչ ցաւոց, քակտիչ դառնութեանց, պահպանարան հանգստեան, հնարք նիրհման, յարմարիչ քնոյ, պարգեւիչ ննջման,

չնչոյ յարակարգութիւն, զգայնութեան տևողութիւն, ցրիչ ցնորից, յեղանակիչ անընդ, փոխարկութիւն զարհուրմանց, այլակերպութիւն տխրութեանց, խափանիչ խիթմանց, ընդարձակիչ կարծեաց, համադրութիւն ծփմանց, ահագնութիւն խարդախմանց, հարուածիչ դիւաց, փախուցիչ ախտից, ընկղմիչ գայթակղութեանց:

Բ. Պաշտպանեա՛ երկնաստեղծ ձեռամբդ, զօրացո՛ բարձրացեալ քո աջովդ, ամփոփեա՛ ամենակալ թևօք, ծածկեա՛ աստուածային խնամօքդ, ամրացո՛ վերակացութեամբ վերնայնոցդ, շուրջանակի պարսպեա՛ գումարտակօքդ անմահից, ի յամենուստ պարփակեա՛ կցորդութեամբ հրեշտակացդ, վանեա՛ զընդդիմամարտն իմ զինուորութեամբ զուարթնոցդ, պատսպարեա՛ զսասանեալս՝ Աստուածածնիդ մաղթանօք, զբանակս անդրանկացդ բարեկարգեա՛ ինձ պահապան: Բա՛ց ընդ աչացս և զմտացս իմ

տեսանելիս, զգաստ արա՛ ընդ ոգևոցս և զծանրաբեռն կրիցս դանդաղութիւն, վերացո՛, Տէր, ի զգայնութեանցս զմածեալս յիմարութիւն, բա՛րձ, միայն բարեգործ, զպատրուակիս թանձրութիւն: Ընդ սկզբան բերմանս լուսոյ՝ զողորմութիւն քո ծագեա՛, ընդ ելից արևուն՝ արդարութեան արեգակդ ի յանձկութիւն սրտիս մտցէ, ճառագայթ քո փառացդ՝ ի յիմաստիցս խորհրդանոջ ջահեսցի: Խաչիդ տեսունագրութիւն ընդ շունչս և ընդ մարմինս համասփիւռ տարածեսցի: Յանձն առնեմ քեզ յաւուրս զքո յարմարեալ տաղաւարս պահպանաւ ոգևոյս որ ի սմին: Զի դու ես Աստուած անքնին, առ ամենեսին բաւական և յամենայնուժ բովանդակ, օրհնեալ յաւիտեանս. ամէն:



Ի ԽՈՐՈՑ ՍՐՏԻ ԽՕՍՔ
ԸՆԴ ԱՍՏՈՒԾՈՅ
ԲԱՆ ԶԹ.

Աստուած և Տէր, կեանք և արամիտ, ողորմած, գթած, լոյս, երկայնամիտ, անոխակալ, մարդասէր, ամենագութ, պարգևատու, փրկիչ, օրհնեալ, գովեալ, բարեբանեալ: Դարան ամրութեան, պատսպարան վստահութեան, առանց նենգութեան բարի, առանց խաւարի ճառագայթ, քաւիչ մեղաց, ողջացուցիչ վիրաց, անհասանելեաց հնարք, անմատչելեաց հպաւոր, անյուսուցեան ելք, անուն քո խոստովանեալ Աստուծոյ Որդի. և Հօր քո ընդ քեզ հզօրի և ահաւորի, և Հոգւոյդ ամենակալի և ընդ քեզ երկրպագելւոյ՝ փառք և պաշտօն գոհաբանութեան յաւիտեանս. ամէն:



Ի ԽՈՐՈՑ ՍՐՏԻ ԽՕՍՔ
ԸՆԴ ԱՍՏՈՒԾՈՅ
ԲԱՆ Ղ.

Ա. Բարեբանեալ Աստուած երկնաւոր, միայն արարիչ, Տէր ամենակալ, մեծութիւն ահեղ, գթութիւն օրհնաբանելի, ողորմութիւն խոստովանելի, բարերարութիւն երկրպագելի, խնամակալութիւն պաշտելի, մարդասիրութիւն տօնելի, պահպանութիւն խնկելի, բարձրեալ անքնին, մերձաւոր կամարար, ապաւէն անկասկածելի մխիթար սրտից, փարատիչ վշտաց, ապաքինիչ ցաւոց, սպառումն վհատութեանց, բարձումն պարտեաց, փոխարկիչ կարեաց, կարգաւորիչ կրից, յարմարիչ բանից, սանձարկու լեզուի, շրջադրութիւն շնչոյ, կացուցիչ հագագի, ամփոփիչ խորհրդոց, կրթարան կամաց, արձանացուցիչ յուզմանց,

հանդարտութիւն մրրկաց, խաղաղութիւն ծփանաց, որ ունիս զթևոց ամենընթաց իշխանականիս և իմաստութեամբ նուաճեալ առ քեզ դարձուցանես:

Բ. Գոհաբանեալ միշտ երախտաւոր, որ հեզութեամբ անհպարտութեամբ երկայնամտեալ հանգչիս տենչանօք անճառ հրաշիւք յանձինս սրբոց: Թագաւոր էից համայնից, ամենայնիւ ծանուցեալ զթած, սկզբնահայր և նախաշաւիղ սիրոյն ընթացից, ճանապարհ կենաց, որ առաջնորդես քաղցրութեամբ դիմելոյս ի լոյսդ վերին: Ձեռնկալու մեծ վստահութեան, որ ոչ թողացուցանես գայթակղելոյս ի վայր կործանիլ. յուսոյ կերպարան, ճշմարիտ առհաւատչէի աղաչողաց մատանց յայտնի երևեալ. ապաւինութիւն հանգստեան, որ ոչ երբէք մատնես վտանգի դատապարտութեան: Ազատութիւն շնորհաձիր, որ տաս լիապէս առանց փոխատրութեան

փրկանաց. առատութիւն աննախանձելի, որ քոյին փառաւորութեամբ զանարգ նիւթ հողոյս ճոխացուցանես: Պայծառութիւն անստուեր, որ ճառագայթիւք ահեղ բարձրութեան պարածածկեալ զթշուառս՝ կրկին բարգաւաճ առնես: Քաւիչ մեղանաց բազմաց, որ զհերքեալս ի փրկութենէ առաջնովն պայծառութեամբ նորոգեալ՝ վերստին վայելչացուցանես: Հնարաւոր դիւրահաս առ ամենայն ամբաւ գերամբարձութիւն յաւէտ յառաջեալ. ելք վստահութեան առ խոստացելոցն վայելս. երանութիւն անձկալի, յոր զկենդանութիւն շնչոյս լքանելն է ախորժելի, զի զքեզ գտից կենդանի: Կամք անփոխադրելի առ ի քաւութիւն գերւոյս զօրացեալ ամենագովելի. անսխալելի դեղ կենաց, որ և մեռելոց բնաւին եղծելոց առնես զսքանչելիս: Ամենաստեղծ աներկբայելի, որ զհուրբ կիզեալն և զհողմով հոսեալն և զժանեօք զազանաց ծախեալն, ի քթթել ական նո-

վին հիւթականութեամբ անպակաս յարուցանես: Անհաւասար համարձակութիւն, յորում Աստուածօրէն պարծանօք պարծելն է իրաւացի:

Գ. Հայեա՛ց, Տէր, յերկնից զուարթ քաղցրութեամբ յամենակործան վտանգ նեղելոյս, և արա՛ անդորր հանգստական դիւրաւոր ի բազմատագնապս հեծութենէ: Եւ զյարուցեալ գումարս սատակչացն, եթէ սպառուզէնք այսական դժնեայ հնարաւորութեան բուռն մարտակցաց պատկանեալ զինուք, եթէ մեղաց տգեղ և քո ատելի կերպարանք, եթէ ցաւոց և ախտից վատնիչ և կորստական նշմարանք, մերժեսցե՛ս, հանցե՛ս, հատցե՛ս, խափանեսցե՛ս և հալածեսցես՝ հեռի սահմանաւ իսպառ տարագրեալ անդարձ որոշմամբ վերստին կորստեան. և կառուցե՛ս, կացուցես նպատակ կենաց և ամուր մահարձան՝ զնշան Խաչիդ ապաւինելոյս ի քեզ փրկութիւն: Եւ

յայսմ անպարտ և անպատիր և անվանելի արուեստից ահաւորիդ մեծութեան, լուծցին որոգայթքն գաղտնածածուկ սատանայականք, կապտեսցին մեքենայքն, վատնեսցին գայթակղութիւնքն, խայտառակեսցին հաղբիցն դրութիւնք, յայտնեսցին երևոյթք որսոյն, գտցին նենգողին ծուղակք, վերասցին վարմին վերարկուք, տոչորեսցին որոմանցն բոյսք, նզովեսցին բռնաւորին չարաբանութիւնք, կտրեսցի լար խաբէութեան ի մահ որսողին, պարսեսցին պատրողին բանսարկութիւնք, պակասեսցին զէնք զրպարտողին, անկցին սուսերք մահաբերին, սուզեսցին սաղրողին պատրաստութիւնք, արձակեսցին տոռունք տագնապողին: Այլայլեսցին սուտ կերպարանք կեղծաւորին, սատակեսցին խրոխտականացն խիստ յարձակմունք, ցրուեսցին կցորդութիւնք կերչացն, բաժանեսցին ազինք աւազակացն, քայքայեսցին բոյլք բարբարոսացն, քանդես-

ցին ամրոցք ապստամբողացն, արգելցին ամպրոպք յանդգնելոցն, փարատեսցին փորձողին անձրևք, հալեսցի և ցամաքեսցի եղեամն աղանդաւորին: Խորտակեսցի եղջիւր գոռոզին, մանրեսցին ամբառնալիք դրօշիցն կերպարանաց, փշրեսցին ամբարհաւածութիւնք հպարտացելոց, նահանջեսցին դիմեցմունք ճակատելոցն, քակտեսցին միաբանութիւնք զօրացն Բելիարայ՝ թէ անմարմինք և թէ մարմնաւորք, փախիցեն ընդ նոյն ճանապարհ ի մի շաւղաց հետոց՝ յեօթն տարակոյս, ի գուբն ինձ փորեալ՝ ինքեանք ընկճեսցին: Յեղանակեսցին ձմերունք ձանձրացուցչին, հատցի կապն կցորդութեան մշտաջան աւազակին, նողկասցի մտացս կացից՝ համբոյր շողոքորթին, ընդմիջեալ մեկնեսցին նետաձգութիւնք նեղչին, կացցէ ի սասանման նաւ խարդախողին, խլեսցին յարմատոց անտի ատամունք խածանողին:

Դ. Վասն փայտիդ օրնութեան կենաց, յորում պրկեցար Աստուածդ անըմբռնելի, յիշատակաւ բեւեռացդ, որով ի գործի մահունն մածուցար, արարիչդ երկնի և երկրի, արեամբդ տէրունականաւ, որով զվիշապն մեծ կարթիւ ածեալ որսացար, լեղւոյն դառնութեամբ, զոր արբեալ զդեղատուութիւն կորուսչին արտաքս հեղեր, պատմաբանութեամբ ըղձական ճառիւք կրիցն սարսափելեաց, որով զլրբութիւն հակառակողին ըմբերանեալ ամաչեցուցեր. անուամբդ անհասականաւ ամենայնիւ անթարգմանելւոյդ, յորմէ դողան և դատապարտին սոսկացեալ սաստիկ սարսափմամբ բնութիւնք ամենայն երևութից և աներևութից. եղիցին այս ամենայն պարգևք շնորհաց խոստովանելոյս ի պաշտպանութիւն, ի բժշկութիւն և ի քաւութիւն: Եւ մահաբեր դառնաթոյն օձին և որ ի նմա ազդեաց տիեզերադաւ չարութիւնն, ի սատակումն եղիցի նորին. նոյն

ինքն ի կորուստ և ի յանբժշկական հարուած տանջանացն՝ սովաւ մատնեսցի, կապեսցի և ըմբռնեսցի: Եղիցի ողորմութիւն ստեղծողիդ ընդ իս, և շունչ ոգւոյս իմ ընդ քեզ անբաժանօրէն կապաւ միացեալ ի մի:

Ե. Եւ որ ոք ընթերցի զայս աղերս ճայնի մաղթանաց զոչման աղօթից հայցման ծերոյ և տղայոյ, կուսի և երիտասարդի, և եթէ յաղախնեայց ոք պաղատեսցի աստուածսիրաբար, հաւասարապէս անաչառութեամբ ընկալցին ի քէն մասն երանութեան պարտուց ազատութեան, հաստեալ վերստին յանարատութիւն նորոգ մաքրութեան, նկարեալ դարձեալ զքոյդ կերպարան անփոփոխելի: Ահա տիրապէս հնարաւոր, զօրեղ, անիմանալի, տեսցես աստանօր ի հառաչանս կողկողանաց այսր հեծութեան, որ ի բոլորից շրթանց ընծայեալ քեզ մատուցանի, վասն Հօր քոյ երկնաւորի և բարերարի,

և Հոգւոյն Սրբոյ փառակցի և կենդանատուի, Աստուածածնիդ բարեխօսութեամբ և խնդրուածովք ամենայն սրբոց: Զի դու ստեղծեր զամենայն, և ի քէն եղեն ամենայնք, և դու տիրես ամենայնի, և քեզ փառք յամենեցունց. միդ իսկութենէ անժամանակ Երրորդութեանդ, զուգակցապէս փառաւորեալ յանբաւս և յաւիտենից յաւիտեանս. ամէն:



**Ի ԽՈՐՈՑ ՍՐՏԻ ԽՕՍՔ
ԸՆԴ ԱՍՏՈՒԾՈՅ
ԲԱՆ ՂԵ.**

Ա. Արեգակն արդար, ճառագայթ օրհնեալ, լուսոյ կերպարան, փափաք անձկութեան, բարձրեալ անքնին, զօրեղ անպատում, բարւոյ բերկրութիւն, յուսոյ տեսութիւն, գովեալ երկնաւոր, թագաւոր փառաց Քրիստոս արարիչ, խոստովանեալ կեանք: Եւ արդ, զթերութիւն վրիպանաց բազմասխալ ձայնի եղկելոյս՝ ամենազօրդ բանիւ լցեալ մատուցես յաղերս հաճութեան Հօր քում բարձրելոյ: Որ վասն իմ ի փորձ եկիր անիծից, կերպարանեալ զիմ նմանութիւն՝ ամենեւին կենաց օրհնութիւն, վերնոց և ներքնոց բարեխնամող տեսուչ համայնից: Զի թէ յանձն առեր մեռանիլ վասն իմ՝ Աստուած և Տէրդ բոլորե-

ցուն, որչա՛փ հաճեսցիս առաւել և այժմ վտանգաւորս կրից կարեկցել, ընդ իմ պարտաւորիս միշտ աղօթելով ազգակցաւ մարմնոյդ առելոյ ի մէնջ՝ առ համապատիւդ քո Հայր:

Բ. Եւ վասն արեանդ պատուականի միշտ մատուցելոյ ի հաճութիւն կամաց առաքչիդ՝ բարձին վտանգք մեղուցեալ դատապարտելոյս, թողցին պարտիքն, ապաքինեսցի ամօթն, մոռացին պատկառանքն, բարեգործեսցին դատակնիքն, սատակեսցին որդունքն, վերացի լալն, հանդարտեսցէ կրճումն ատամանցն, սպառեսցին ողբքն, հատցին արտասուքն, մերժեսցի սուգն, հալածեսցի խաւարն, վատնեսցի հուրն սաստկութեան, հերքեսցին տանջանարանքն բազմօրինակք:

Գ. Եկեսցեն գթութիւնք կամողիդ և պարգևողիդ կենաց ամենից, ծագեսցի

լոյսդ, արագեացէ փրկութիւնդ, հասցէ
օգնութիւնդ, ժամանեացէ այցելութիւնդ,
կանխեացէ ցօղ ողորմութեան, յառաջեացէ
արբուսցէ զանդաստանս պասքեալ՝
անկեալ ոսկերացս թշուառութեամբ ի
վիհն մահու, ծաղկեցուսցէ պտղաբե-
րեացէ բաժակդ երկնաւոր արեան կենա-
նարարիդ՝ զերկիրս խնամեալ աւուրն
լուսոյ, որ անծախսապէս միշտ պատարա-
զի յիշատակ կենաց փրկութեան հոգւոց
ննջեցելոց: Զի ամենայնիւ մահացեալ
հոգիս մարմնովս մեղաց՝ շնորհօք քո,
գլթա՛ծ, ի քեզ զօրացեալ քե նորոգե-
ցայց, զատեալ ի մեղաց անմահ կենդա-
նութեամբ ի յարութեանն արդարոց, Հօր
քում օրհնեցեալ: Ընդ որում քեզ փառք,
և Հոգւոյդ Սրբոյ բարեբանութիւն՝ վա-
յելչական գոհութեամբ, այժմ և միշտ և
յաւիտեանս յաւիտենից. ամէն:



ԳՈՏԱՆԱԴՆՈՒԹԻՒՆ ԱՌ-ՅԵՐԿԻՆՍ

Գոհանամք զքէն, ո՛վ ամենասուրբ
Երրորդութիւն՝ Հայր և Որդի և Հոգիդ
Սուրբ, որ ասացեր՝ արասցուք մարդ
ըստ պատկերի մերում, և առեր հող
յերկրէ և փշմամբ օրհնեալ շնչոյ քոյ
գոյացուցեր զմարդն Ադամ, վասն որոյ
օրհնեմք զմեծութիւն քո: Գոհանամք
զքէն, որ զմարդն Ադամ զարդարեցեր
եօթնարփեան շնորհօք և երկոտասան
փառօք, վասն որոյ օրհնեմք զշնորհս
քո: Գոհանամ զքէն, Տէր, որ ի դրախտն
զԱդամ անճառելի անպատմելի և հիա-
հրաշ խնդութեամբ, վասն որոյ օրհնեմք
զարարչութիւն քո: Գոհանամ զքէն,
Տէր, որ յետ պատրելոյն Ադամայ՝ յԱր-
գեղայոս անուն օձէն, և արտաքսելոյն
ի դրախտէն, որով ի դժոխս գրաւեցաւ,
ազատեցեր, վասն որոյ օրհնեմք զփրկու-


Թիւն քո: Գոհանամ զքէն, Տէր, որ առաքեցեր զանդրանիկն քո զՄիածին Բանն, որ վասն մերոյ փրկութեան խաչեցաւ, թաղեցաւ, յարեաւ, համբարձաւ, վասն որոյ օրհնեմք զմեծ մարդասիրութիւն քո: Գոհանամք զքէն, Տէր, որ զսուրբ մարմին և արիւն նորա պարգևեցեր մեզ կերակուր հոգւոց և կենդանացուցիչ, վասն որոյ օրհնեմք զպարգևս քո:

Գոհանամ զքէն, Տէր, որ զմկրտութիւն ուսուցեր ի Յորդանանէ և կոչեցեր ի խաւարէ ի լոյս: Եւ ետուր զորդեգրութիւնն վերին, վասն որոյ օրհնեմք զչնորհաբաշխութիւն քո: Գոհանամ զքէն, որ եօթն խորհուրդ եկեղեցւոյ կազմեցաւ ի քոյինդ շնորհէ, և խոստովանութեամբ թողութիւն շնորհեցեր, վասն որոյ օրհնեմք զառատապարգև գթութիւն քո: Գոհանամ զքէն, Տէր, որ անձրև և ցօղ տաս, և բուսանից հաց և հանդերձ և ամենայն մսեղեաց կերակուր, վասն որոյ օրհնեմք զբազմարուեստ տեսչութիւն քո: Գոհա-

նամ զքէն, Տէր, որ միշտ քաղցրութեամբ հայիս յարարածս քո և օր ըստ օրէ շնորհես զբազմամեղ ողորմութիւն քո, վասն որոյ օրհնեմք զանչափ գթութիւն քո: Գոհանամ զքէն, Տէր, որ մեղաւորաց և զղջացելոց թողութիւն շնորհես, ներես և ոչ եղծանես, վասն որոյ օրհնեմք զանյիշաչարութիւն քո: Գոհանամ զքէն, Տէր, զեղանակս տարւոյն՝ զամառն և զձմեռն, զաշունն և զգարունն արարեր ըստ բնութեան մերում, վասն որոյ օրհնեմք զարարչագործութիւն քո: Գոհանամ զքէն, Տէր, որ յայսմ ամի ևս ապրեցուցեր զմեզ անվրդով, անմահ և անկասկած, վասն որոյ օրհնեմք զտէրութիւն քո: Գոհանամ զքէն, որ զմեզ ի մահտարածամէ և յամենայն պատահարաց պահեցեր, վասն որոյ օրհնեմք զպահպանութիւն քո: Գոհանամ զքէն, Տէր, որ ի հրկիզութենէ, ի հեղեղէ, ի շարժմանէ, ի կայծականց, ի խորշակէ և ի սատակմանէ ապրեցուցեր, վասն որոյ օրհնեմք

զապաւինութիւն քո: Գոհանամ զքէն, Տէր, որ օրհնեցեր ի լերինն Ձիթենեաց զկաթողիկոսունս, պատրիարքունս և զեպիսկոպոսունս, որ ճրագ և լոյս եղեն աշխարհի, վասն որոյ օրհնեմք զչնորհաբաշխութիւն քո: Գոհանամ զքէն, Տէր, որ ընձեռեցեր աղամեանս բնութեան քահանայութիւն, որ հրեշտակաց էր կարգ, յաղագս թողութեան յանցանաց մերոց, վասն որոյ օրհնեմք զփրկութիւն քո: Գոհանամ զքէն, Տէր, որ զսարկաւագունս, զպաշտօնեայս և զճահրնկալս սահմանեցեր, վասն որոյ օրհնեմք զլուսաւորութիւն քո: Գոհանամք զքէն, Տէր, որ զբանաւոր հօտ՝ զժողովուրդս ընկալեալ ունիս ի ծոց քո, և որպէս զտապանն Նոյեան ազատես ի հեղձմանէ մեղաց, վասն որոյ օրհնեմք զզարմանահրաշ գթութիւն քո: Գոհանամ զքէն, Տէր, որ մեղուցեալ ժողովուրդն ոչ պատժես ի տան քում քաւարանի, այլ զդարձումն նկատես, վասն որոյ օրհնեմք զերկայ-

նամտութիւն քո: Եւ վասն մեծի և բարձու ողորմութեան քո, խոնարհեցո՛, Տէր, գունկն քո ի ժամուս յայսմիկ և տո՛ւր մեզ յերկնից ի սրբութենէդ՝ շնորհ, ճիւղ, ողորմութիւն, քաղցրութիւն, կարողութիւն, մեղաց թողութիւն, առատութիւն, մեծութիւն, աշխարհիս խաղաղութիւն, խնդութիւն, լուսաւորութիւն, Հաւատ, Յոյս, Սէր, մաքրութիւն, առաքինութիւն, բարեաց լիութիւն, հանդարտութիւն, անդորրութիւն, օգնութիւն, հաշտութիւն և օրհնեալ արքայութիւն: Եւ քեզ ընդ Որդւոյ և ընդ Սուրբ Հոգւոյդ վայել է փառք և պատիւ յաւիտեանս. ամէն:



ՑԱՆԿ

Երկու խոսք	5
Հաւատով խոստովանիմ.....	7
Աղօթք պահպանութեան.....	18
Աղօթք վասն կապանաց դիւաց.....	35
Աւետարան ըստ Մատթէոսի	
Եւ մինչդեռ անցանէր	37
Աւետարան ըստ Մարկոսի	
Եւ ել լուր նորա	38
Աւետարան ըստ Ղուկասու	
Եւ եղև ընդ աւուրսն	39
Աւետարան ըստ Յովհաննու	
Յետ այսորիկ տօն էր.....	40
Դարձ Կիպրիանոսի	43
Աղօթք Յովհաննու Գառնեցւոյ	
Առ Սուրբ Աստուածածինն	55
Աղօթք Յովհաննու Գառնեցւոյ	
Վասն ճանապարհի.....	58
Աղերս վասն զաւակ ծնանելոյ.....	59
Աղերս առ սուրբ Ստեփանոս	61
Աղօթք զօրաւոր առ երկնային զօրս.....	62
Աղօթք առ սուրբ զինաւորս Քրիստոսի	63
Աղօթք վասն ական և լեզուի.....	64

Աղօթք Գրիգոր Լուսաւորչի.....	65
Մաղթանք առ սուրբ Լուսաւորիչն մեր	67
Աղօթք առ դրան Ս. Եկեղեցւոյ	68
Բան Գրիգորի Նարեկացւոյ	
Ընդդիմամարտ դիւաց	69
Մաղթանք Գրիգորի Նարեկացւոյ	
Ընդդէմ ամենայն չարեաց.....	73
Աղօթք Գրիգորի Նարեկացւոյ	
Որդի Աստուծոյ կենդանւոյ	76
Աղօթք Գրիգորի Նարեկացւոյ	
Աստուած յաւիտենական	78
Աղերս առ սուրբ առաքեալսն	81
Գովեստ սուրբ Խաչին.....	83
Անուանք սուրբ նշանացն	86
Հրաշագործութիւն Քրիստոսի	88
Բան Գրիգորի Նարեկացւոյ	
Արքայ երկնաւոր	89
Բան Գրիգորի Նարեկացւոյ	
Աստուած և Տէր	92
Բան Գրիգորի Նարեկացւոյ	
Բարեբանեալ Աստուած երկնաւոր.....	93
Բան Գրիգորի Նարեկացւոյ	
Արեգակն արդար	102
Գոհաբանութիւն առ յերկինս	105

ԱՂՈԹ-ԱԳՐ-ՔԵՐ - Գ

ԳԻՐՔ ԱՂՕԹԻՅ ՈՐ ԿՈՉԻ

ԿԻՊՐԻԱՆՈՍ

ՎԱՍՆ ԱՄԵՆԱՅՆ ԱԶԳ ՊԱՏԱՀԱՐԱՅ
ՈՐՔ ԳԱՆ Ի ՎԵՐԱՅ ՄԱՐԴՈՅ

Նրապարակչության
տնօրեն՝ Ս. Եզնիկ արք. Պեպրոսյան
Սրբագրիչ՝ Ս. Գրիգորյան
Էջադրումը՝ Ղևոնդ քահանա Մայիլյանի

ՍԱՅՐ ԱԹՈՒ ՍՈՒՐԲ ԷԶՄԻԱԾՆԻ ՀՐԱՏԱՐԱԿՉՈՒԹՅՈՒՆ
Ս. ԷԶՄԻԱԾԻՆ - 2010

Չափսը՝ 70x100 1/32, թուղթը՝ 80 գ., տեքստը՝ 2 գույն,
կազմը՝ կոշտ, 4 գույն, ծավալը՝ 112 էջ,
տպաքանակը՝ 1000:



ՄԱՅՐ ԱԹՈՒ ՍՈՒՐԲ ԷԶՄԻԱԾՆԻ ՏՊԱՐԱՆ